


此兩冊寄存大岸家中

芙蓉江上草堂詩稿
上

國家圖書館 NATIONAL CENTRAL LIBRARY, TAIWAN, R.O.C





國家圖書館, NATIONAL CENTRAL LIBRARY, TAIWAN, R.O.C.



序

余與江陰金一士先生為己卯同歲生其孫淮生
客遊江右己巳秋與余同為吉州太守勅校晤於試
院一見即相契每題紙下淮生必先擬五言八韻一
夕輒成五六首綺麗沉雄不規規於試帖格調余於
是知其能詩校閱之暇遂唱酬無虛日時同校諸君
余年最老淮生年最少皆未有如余兩人之勇且健
者洎余返章門淮生繼至過從益密以其祖遺稿囑



題於是知淮生家學淵源康成小同具有宗派庚午
夏淮生將秋試東歸乞余一言弁其詩之簡首余維
詩之為道其體至不同人之為詩其境亦屢變淮生
今日所詣之境本其清雋之思出以所鍊之筆人咸
知之無俟贅論他日雍容揄揚和聲鳴盛此行其發
軼也吾又不知其所詣之境為何如余老矣竊喜年
家後進繼起有人爰加以評騭并述顛末以為異日
之證云番禹馮詢老良識於章門覺園

序

萍蹤輒左無一握手之緣梅訊先頒有三折肱之譽
賜觀大集允愜素衷過承桑梓之恭欣結芝蘭之契
隨風唾咳疑口角之皆香比雪聰明信胃懷之不滓
捫青挹翠謝客紀遊泛綠依紅庾郎佐幕綢繆花鳥
杜少陵之憂時激厲風雲陳拾遺之感遇不著一字
足當表聖之評早辨四聲獨抱隱侯之譜在吾鄉前
輩中與翁朗夫史問樵兩公為近歷境差同逢時稍

異可謂異曲同工者矣。栻有負所知無能為役。審詩窮其等耳。問句法之如何。自慚老馬識塗。處處綴行之步。深喜新鶯出谷。嚶嚶求友之聲。所期翦燭同論題襟。互賞紅羊。劫過何時。為鄉里之遊。黃鶴歸來。吾輩有山林之樂。乾坤清氣之集。得此可雙田園。稼興之題。宜君第一。辛未人日。悔餘弟何栻拜序。

序

晉熙從逸亭方伯於皖軍。稔知其羣從多能文之彥。而必以漉生司馬為白眉。今歲計偕北上。繞道來江陰。獲與訂交。見所撰著金氏文牘。及所刊篤慎堂燼餘詩稿。益稔其家學淵源。而君用心之厚。好學之篤。亦於此見焉。既出其芙蓉江上草堂詩稿。見示清華名鶴^雋獨舒性情。至感念時事。則悲歌諷諭。尤有杜老白傳之風。始君遭寇亂。出避航海。而歸見井里蕭條。

白骨枕藉盡然不知感喟之所寄於是出大江走金
焦泝舟越皖水訪石鐘麻姑之勝犯鄱陽十八灘之
險折而沿三湘達衡麓觀於洞庭之野雲夢之陬牢
愁抑鬱之思益噴薄而不可禦而其過入之心力又
能追而取之油然以自達於口脗之間舟之行川也
水與風助之也君之詩母亦有助之者哉今君倦遊
返里於芙蓉江上重建草堂如淵明下淇摩詰輞川
登其堂者有超然塵俗之想其為詩則又冲夷簡漠
在陶韋王孟之間雖然君年甫逾壯抱有為之才秉
恬淡之性將見出而用世有本有文又豈僅僅以詩
鳴哉質之逸亭方伯當以鄙言為何如也

同治甲戌新春平江陳晉熙少陶拜序

序

夫黃鐘大呂始成雲門之音太阿干將終騰霄漢之氣故質抱瑰奇自軼凡響材懷鬱勃悉發精英亮由託體既殊呈象自異物之有聲光人則為歌詠昔者屈宋諸子導揚於前李杜諸人繼軌在後由其卓越加以精研故能希蹤古人俯待來者雖曰人為豈非天授今觀於吾友金子之作而益驗余說之非誣矣夫其奇思橫溢風采上引吐氣凌轡乎江漢言情託

興乎河梁賦登高之景六合匪遙工體物之情萬狀
奔赴寫百靈之恍忽續千古之幽思蓋其溯源曩哲
嗣美前徽克衍詒謀用彰繩武基以往歲避兵去家
僦屋江邑地名通德之鄉居近集賢之里時君王
父一士先生齒高綺角志抗羲皇養望林泉耽遊邛
壑操選政之鑒別擅宏獎之風流好學之事因老彌
篤訂交之雅興年相忘基也追隨杖履之暇論答酒
筵之間得所為補讀齋詩受而誦之遺郁在口傾懷
在心康成之後宜生小同丁顛之孫實惟公雅復覩
君製如數家珍感懷舊遊彌益遙愴君今將為萬里
之行不廢四方之志有懷清纓奚假投筆草陳琳之
檄濡毫當風揮祖生之鞭拔劍擊地文章事業當更
可觀至如基者蜷屈一室蟲吟九秋伏雌不飛病駕
難駕重承眷顧屬為序言竊念通家累世之誼又值
良友惜別之辰悽惻中懷倍難自遣惟冀後日者君
歸遠方僕迂道左話舊事於席上出新詩於袖中相

與竟日論文終夜命酒斯時之樂可預識也爰歌驪
唱用弁鴻編不辭悚惶輒敘顛末焉爾同治十年歲
同治歲次重光協洽孟冬之月武進徐壽祺桂珺甫
拜序

序

語云詩能窮人豈詩之果能窮人也哉殆亦靜躁之
不同遭逢之各異也問嘗綜古昔之遺軌較篇章之
得失推原其故殆有三焉或者痛峭自矜崖岸獨異
一篇之成謂後無來者一語之妙覺前無古人表嘏
之自重其文審言之勇於自讚其弊一也或者獨耽
聲病雅好篇章深思所往則土木形骸屬語欲工乃
遺棄寢食左太冲之居涸上王摩詰之入甕中其弊

二也或者綺麗自珍風流未沫形容佳麗則逸藻雲
飛寄托閒情每吐詞風雅比元微之之感溺有杜司
勛之放宕其弊三也總此三弊瑕隙可蹈指摘叢生
凡今之人尤所乘異僕也不幸躬自蹈之若淮生同
轉之芙蓉江上草堂詩稿其底幾得免於此乎君家
同王謝才比機雲有何氏三高之風擅馬氏五常之
譽金昆玉友三筆六詩加以姿稟絕人媚學不倦王
文度號江東獨步盛孝章有天下大名少歷間關曾

經烽火大則撫時感事恒按劍於中宵小則弔夢歌
離獨裁箋而長嘯王筠賦物不假題署而知少陵成
篇時露忠愛之意淡而彌永久而日新可謂江漢之
英靈豫章之瑰器盡祛三弊奄有衆長者也蘊璘宦
跡偶同論文謬賞屬弁言於卷首爰討論於寸心獲
落自慙低徊彌已千秋論在定應領袖推君三折肱
傳應許推襟及我

光緒六年五月漢軍蘊璘拜序

序

紹楨兒時喜學詩先大夫見而哂曰小子休矣古之
詩人非讀萬卷書行萬里地亦無以自名其家也紹
楨於是姑舍詩而讀書思以充其萬卷之數而日侍
父兄旁所謂行萬里地者顧未能得一里焉及冠謀
食于四方風馳雨奔所至山林川澤未嘗無可以助
吾之詩而窮愁困其心志復不能專力讀書然後知
學詩之難有如是也江陰金莊生先生少遭離亂間

關出走嘗西抵鄱陽南極洞庭瀟湘既壯而仕又北
臨燕趙東浮海而至吾粵凡夫所見山川草木雲烟
魚鳥以逮歷代興亡遺跡朋舊嘯歌雖一物之微一
言之細苟有所得皆不憚詳稽而記之又予以陳述
家學推論時政莫不原^原本本著為栗香筆記若干卷
紹楨讀其書綜其生平所游歷與所瀏覽何啻超萬
里破萬卷追維吾先大夫之言固知先生必工於詩
今歲九月先生始寫定其芙蓉江上草堂詩稿四卷

見示其前有周昉叔運使題詩以為先生方上晞唐
宋下撫元明涵泳百家獨開生面譬猶千狐之腋千
鷄之蹠未真滙液奄有衆長斯非真所謂古之詩人
能自名其家者乎紹楨幼而學詩長而不能成學殖
荒落亦自絕意於此讀先生之詩其足呂興起吾之
志者何限假我十年暇盡取吾家藏書而讀之裹糧
橐筆浪游三吳烟水間洗蕩其塵懷擴充其聞見庶
幾從先生執鞭先生倘亦憐而教之乎謹書此以為

券光緒十二年十月番禺徐紹楨拜識

評跋

番禺陳澧蘭甫

金澁生司馬來粵晤設者屢矣氣宇和雅通達政事
宜其能詩也近者見示所作芙蓉江上草堂詩稿四
卷其五言律句云櫓聲搖月碎帆影受風斜春陰不
成雨釀作一庭烟歸舟已昏黑溪水一條明何處是
村落遙聞犬吠聲七言律句云得句每愁難屬對觀
書常恐易終篇白雲滿地客何處啼鳥數聲花亂飛

偶逢奇石向人立時有閒雲隨客留含烟隄柳團濃
綠隔霧溪花綴小紅短篷忽覺微陰覆知是紅橋乍
過時江鄉我愧蕭閒甚只有扁舟一釣竿皆清妙可
誦古詩佳者甚多長篇難於鈔錄然如書生無實用
俗論多謗傷相期雪此言此願會可償豪宕語尤可

喜也

識月軒
詩話

祥符周星譽的叔

是編門徑最正工夫最純律細格高無體不備蓋桂

生方上晞唐宋下蹠元明涵泳百家獨開生面譬猶
千狐之腋千雞之蹠采真瀝液奄有衆長斯巧匠之
伎神而良工之心苦矣合各體論之則近體駕古體
之上七古駕五古之上淮生詩稿所存古體每較近
體為少而近體中則七言律絕尤擅勝場請與知詩
者共證之

此卷大抵皆酬應之作較之佗卷似覺減色可見詩
文一道要在自舒懷抱著不得一點矯揉至於次韻

和詩屢疊不已。是於酬應之外。又加一番苦趣矣。前輩名家。多不喜次韻。且於酬應諸作。都不存稿。有以哉。

是編大都于役嶺海。即事拈題。令讀者如置身瘴鄉。蠻落中。景物之殊。風俗之僻。得此妙筆。以傳神寫貌。如禹鼎之鑄。温犀之照。可謂極文章之能事矣。所作較漑生諸稿。別具面目。昔人論太白入蜀。東坡過嶺。詩境一變。漑生胸次。殆無竒不有。吾不能測其所至也。

山陰汪琬笑生

氣充而不肆。辭清而能腴。金絲引和。笙磬相於。乍鏗爾。以夏玉亦纍然。而貫珠以樂喻詩。斯毫順之中聲與。

嶺南西道山水奇勝。著稱域中。讀大集諸篇。蘊仁智之耿思。極刻鏤之姿致。不啻披少文圖。繙柳州記矣。至於感時即事。興會深微。又如昔人評漁洋詩。所謂

登覽之餘別饒寄託者既以朱園標其警句並識蠡測於上方復綴數言用志傾倒

江甯陳兆熙耘茶

大集原本忠愛發抒性靈遇欣則韻與笑偕焉戚則墨兼涕隨深合溫柔敦厚之旨而又不名一家僭識數言正如吾家后山願奉南豐一瓣也

陸

題詞

全椒薛時雨慰農

我遊崇川歸時歸自通州登臨興頗遂江山羅心胸雲水

入夢寐瘦奴肩吟囊拈題多即事情景難逼真存者什一二掩關讀君詩語語出我意章貢我舊遊往蹟從頭記金焦我新遊後先若把臂君詩即我詩妙不關文字惜我漸頹唐翰君饒斌媚荷芰棲鴛鴦蘭若戲翡翠春雲嶺上舒曉露花梢墜祖武洵堪繩謂全祖

先生宗派別有寄馮良子何廉我社友品騰各深邃傷
哉何遜亡沆瀣失同類馮唐亦老矣音書遠莫致海
內幾詩人俯仰重流淚期君進閱富休明資鼓吹莫
學醉吟翁山林樹一幟

歸安姚覲元彥侍

以下均題粵西遊草

信有江山助清吟迥出羣宏深却詵策幽峭柳州文
人物蘭陵盛才名金粟聞鄒陽好伴侶壇坫張吾軍

閩縣龔易圖藹人

桂林山水天下奇卧遊時復生遐思讀君歌詩出金
石近年邊徼多旌旗考勝好尋籌筆驛探奇已到道
鄉祠豈徒叩壑留題詠我亦南交欲問師

祥符周星譽昀叔

羣從兼文武門材總軼倫大名高一代餘技了千人
書劔從軍舊江山歷宦新會題一品集莫自惜風塵

江都張聯桂丹叔

水自靈渠發山從陽朔奇讀君新詠本憶我舊遊時

灘急舟行速，峯高日上遲。別來今十稔，慚愧鬢成絲。
不辭千里遠，邊事問炎方。異境筆能狀，奇才斗莫量。
風流追畫壁，雲氣壓歸裝。豈作滄桑感，匡時策自長。

臨桂周璜絃卿

神工鬼斧漫雕鏤，風雨毫端捲未休。留得紀程詩卷
在，水光山色共夷猶。
珠江秋早片帆催，似為尋詩度嶺來。把卷狂歌頻叫
絕，風塵真有謫仙才。

山陽秦煥文伯

燕臺回首夢如烟，粵嶺論心月在天。舟楫需材名世
貴，山川能賦大夫賢。搜奇不落唐虞後，詠古真追漢
魏前。多少蒼生懸眼望，豈惟風雅賴仔肩。

江流淮水接松鄉，宦轍東西共海疆。兩省關河籌幹
濟，一編金石著文章。杜門我慕陶元亮，出塞人思狄
武襄。散徧十洲霖雨後，還山再築浣花堂。

宜興徐瑋文植之

桂林山水甲天下，行人到此入圖畫。畫工閣筆不能傳，君詩直如王朝川。讀一篇詩開一境，步步引人入勝。山勢筆勢爭雄奇，卧遊把卷神迷離。欲問筆妙胡至此，合呼李嶠真才子。一瓣心香三復時，低首宣城自此始。

嘉興沈宗濟廉仲

蘭陵多僊彦，夫子況清才。行役詩篇富，江山異境開。籌邊厯遠慮，問俗念沉災。信有匡時略，非徒擅雅裁。

桂嶺佳山水，從官路阻之。羨君探勝槩，令我寄遐思。

張范風堪溯

宋南軒張公帥桂林詩極多見韓蘇蹟於集中竊謂堪與石湖相伯仲

偶遺

用稿中陽湖山句意

何人編粵載，按續待來茲。

鄉先哲汪碧棠先生

粵西詩載搜萃題詠甚夥百餘年來無續編者

芙蓉江上草堂詩稿卷一



書所見 咸豐乙卯

江陰

金武祥

淮生

世人好學仙辟穀絕火食食松與茹芝飛昇可白日
繫昔盤古時本食草木實及夫燧人氏始教烹飪熟
未聞燧人前盡得長生訣茫茫三神山仙人究誰識
天地妙循環有生必有滅即擅不死方造物亦所疾
惟有太古人沕穆本凝一人皆享遐齡何有仙凡別



常言人善惡冥報尤昭昭人生所行事纖屑無能逃
未知幾閻羅誅賞地府操事苟一一判冥司亦太勞
人心且難測安能察秋毫而况天好生陰律何紛淆
旨哉吾儒言禍福祇自招此氣所感應其理本不遙
且莫致窮詰此說非一朝亦寓勸懲意成見不必膠

馮子良太守詞云以韻語說理近賢惟歐北集中
最多此二首卓識名論歷齡得之大難

泛舟至泳鯉橋

紅樹青山外斜陽好放舟風多帆力健潮定櫓聲柔

蓼折曾扶蠓蘋開為泛鷗數家臨水處柂杙任淹留

薛懋農觀察時雨云意新而句渾

郡城歸舟聽雨

風雨能令咫尺遙篷窗高枕聽瀟瀟不知舍北灣環
水綠到村前第幾橋

陳蘭甫京卿澧云神韻似漁洋山人

紅梅

江上尋梅駕小舸紅羅一曲喜頻操本無色相容何

豔。便。著。脚。脂。品。亦。高。夢。到。西。湖。驚。絳。雪。客。來。東。閣。認。
緋。袍。巡。簷。索。笑。饒。佳。趣。倍。覺。媽。然。暖。意。叨。

何廉昉太守杖云次聯名貴
薛云風骨自是傾城妹

漁翁

清。晨。理。漁。榜。泛。泛。逐。鷗。鷺。欸。乃。只。聞。聲。盪。入。煙。中。去。

岸。側。水。滌。河。猶。舟。行。處。

薛云此似韋柳

春日舟行

遊。覽。何。嫌。盪。漿。遲。沿。溪。一。任。野。航。移。短。篷。忽。覺。微。陰。

覆。知。是。紅。橋。乍。過。時。

陳云風神豁宕

夜坐

光。陰。迅。速。暗。中。移。颯。爽。三。秋。景。最。宜。萬。籟。共。爭。風。過。
處。衆。星。俱。讓。月。來。時。吟。詩。還。擬。長。城。倚。縱。酒。何。須。大。
戶。辭。多。少。羈。人。在。天。未。塞。鴻。消。息。漫。遲。遲。

馮云是唐人寫景
何云饒有比興

秋日至姬山小湖

綠。波。如。畫。白。蘋。洲。柳。色。微。黃。繞。渡。頭。忽。訝。中。流。紅。綽。

約殘荷猶剩一枝秋。

穿過深林路一條，忽看茆舍住山腰。尋途欲訪幽人宅，尚有清谿隔幾橋。

山重水複步遲遲，夕照蒼茫欲暮時。漁父似知秋色好，停舟多傍蓼花枝。

登君山書院小憩

獨擅蓉城勝，登臨萬象呈。遠峯明夕照，高閣納江聲。古木森千尺，幽禽時一鳴。此間容閉戶，不願逐浮名。

何古六辭運建

偶成

碧簾紅掛夕陽低，花影重重向晚迷。燕子忒忙巢未穩，柳梢先借一枝棲。

芍藥

芳菲開盡總繽紛，婪尾還欣殿衆芬。三月春歸誰伴我，十年夢覺入逢君。玉盤色異人爭看，金帶名標種孰分。只讓花王稱第一，自教花相獨超羣。

陳云次聯用事如鹽著水大方家數爾爾

鏡

虛堂懸處一塵無。望去光明月影俱。直使憑空起樓閣。卻教依樣畫葫蘆。照來定可妍媸判。相對何曾喜怒殊。更有芙蓉徵及第。當年嘉兆信非誣。

薛云於素趙二作外別出新意

秋夜

更深秋色正溶溶。高閣涼生第幾重。月影半階人未睡。一庭風露韻鳴蛩。

遣興

雨後山光落檻前。蕭蕭翠竹早秋天。谿深積水分流瀉。葉落斜陽倒影穿。得句每愁難屬對。觀書常恐易終篇。蕭齋鎮日多欣賞。信有人間翰墨緣。

陳云神似放翁

郡城歸舟至青巖墩偕謝薇生外兄杜子健表

阮作

十里烟波遠歸來。已暮霞櫓枝搖月碎。帆影受風斜。

近渚驚聞鷺荒陂鬧晚蛙泛舟偕二客遊興此時賒

落葉

江上秋聲日夜馳又傳寒訊滿天涯疎林月冷烏啼
夜舊徑風乾鹿過時此日禁霜餘老幹他時承露待
孫枝卻看生意依然在休抱淮南木落悲

零亂斜陽水一灣霜痕飄處尚瀾斑攪和雨脚敲窗
外攪碎秋心在枕間有客攀條悲故國更誰尋夢到
空山吳江波冷楓初落佳句吟成且莫刪

庚申四月上浣避難將赴閩省作

人生所難堪莫如離別語况當亂離間遠行更悲楚
我生偏不辰逢天方殫怒寇警已八年一朝竟難禦
兵燹遍鄉閭何地稱樂土重闈向我言汝無兄弟苦
走避宜早思南閩尚安堵適彼且依劉莫惜寄人廡
休憚跋涉勞余其早送汝二老已八旬扶杖形僂
吾親亦始衰家計艱彌補亂離忽遠行各自動悲憫
愁兒年齒弱憂兒道阻一一代躊躇片時縈萬緒家

貧挈眷難江村權避處時全家避居北鄉吳墅未知兒行後一
家更何所言及增酸辛吞聲不能吐嗚咽前致辭骨
月有時聚長吁竟出門淚如雨

陳云淒惻纏綿曲折盡致得力於少陵為多

舟至嘉興界道梗不前暫寓平湖鄉作此寄慨
隻身轉徙亂離間中道徘徊涕自潛阮籍窮途惟痛
哭杜陵閒道望生還澤潏鴻雁情誰恤藩觸羝羊遇
更艱翻悔當時輕作別不應撒手去鄉關

何云沈隱沈著

伶俜何處一枝安搔首長天思渺漫世亂卻傷為客
早囊空但覺告人難蟲沙正值蒼生劫難黍偏逢野
老歡村人郭姓回首烽烟猶未息何時歸去話團圓

疑留甚殷
遇同鄉人

三吳淪浩劫異地獨羈遲忽聽鄉音熟偏增客路悲
未遑通款曲各自訴流離烽火猶如此同歸待幾時

薛云曲折而達
何云真摯

泊吳淞江

底事入江海，翻教足勝遊。潮聲隨月湧，雲氣挾山浮。
故國驚烽火，天涯動客愁。吳淞今日過，風阻又淹留。

時已阻
風雨日

九月上浣抵家即事

不能遂遠行，能不戀鄉里。招回天外魂，免作路傍鬼。
航海間道歸，一家祿悲喜。追言兒去後，烽烟驚四起。
潛行麥隴間，慘慘危莫比。道兒幸先避，免共此流徙。
嗣聞前途危，又無書一紙。翻悔令遠遊，行踪無定止。

今汝忽歸來，回思轉流涕。驚定猶生憐，風塵面目改。
還問舊相識，半作國殤死。相睽無幾時，滄桑倏變矣。
且莫冀苟安，兵戈尚未已。何當携家去，共入桃源裏。

詳云與前避難一首同一情真語摯

辛酉首夏述懷

江關蕭瑟恨何如，避寇偏難更卜居。得福轉因亡塞
馬，餘殃尚恐及池魚。堪嗟人事多遷變，空望妖氛盡
勦除。太息鶯花歌舞地，三吳回首盡成墟。

細柳新蒲最動愁。書生常抱杞人憂。明知草竊時難久。無柰瓜期歲已週。鶴唳不堪頻報警。狼吞到處尚窮搜。白頭野老多情話。追溯昇平也淚流。

滄海桑田劫未闌。那堪時節又春殘。感深吾輩嗟何補。亂在人心治最難。呼作馬牛曾漫應。處同燕雀敢偷安。有誰尋得桃源路。隔卻雲山歲月寬。

馮云雜字韻寄慨無限
大酒莊

陡覺江天朗。開帆趁晚晴。殘雲拖雨過。新漲挾潮生。

村小還成市。途遙不計程。劇憐今夜月。偏照客舟明。

秦興道中

依依楊柳拂春風。芳草斜陽一徑通。問路不欺知俗厚。款賓有禮識年豐。連村樹色千重翠。映水花枝兩面紅。如此溪山最佳處。劇憐行旅太匆匆。

馮云次聯理語不腐

鎮江舟次

孤帆纔見下揚州。鐵甕城邊又泊舟。客夢喜隨家北

渡時全家已 鄉心還共水東流
無邊芳草迷瓜步 不
斷青山到石頭 日暮空江憑眺處
茫茫鼓角動人愁

大通鎮

繁華塵市水西東 憑眺江頭歎轉蓬
客老孤舟忘歲 月人經浩劫悟窮通
一身出入干戈裏 千里稽遲道
路中遙識高堂念遊子 嶺雲千疊盼征鴻

馮云次聯渾老

登石鐘山遊紺園

名園蹊徑本天成 一覽江山倍有情
百戰尚思金鼓

震湖口自癸丑陷後至丁巳克復凡五
年湖山頂建昭忠祠皆祀水軍戰歿者千秋猶作石

鐘鳴翻湖水 遠孤帆出廬岳 雲開夕照明 且向坡山

樓上望 不須月下小舟行
臨江有坡仙樓并
刻石鐘山記於壁

風順口占

扁舟如葉剪江行 我與湖山大有情
更喜一番風順 處小姑迎罷大姑迎

舟過鞋山數里忽南風大作迴泊姑塘關

鷓首今真退淹留又此關水連天作岸風激浪成山
島嶼蒼茫外帆檣出沒間沙隄聊散步羨斂白鷗閒

曉過峽江縣

解纜趁清曉南來第幾程雲低藏塔影風急亂灘聲
古樹多欹岸青山半入城夢迴殘月落江上一帆輕

廬陵道中

江流吉字水澄清曲折沿溪不計程村樹含煙迷遠
迤山雲挾雨亂陰晴獨憐天際孤帆影怕聽秋空一

雁聲城市繁華風物美亂離偏觸故鄉情

張家渡文信國公故里

半壁殘山可奈何虞淵日挽魯陽戈小朝莫挽偏安
局大節無慚正氣歌曾讀遺文欽凜烈相傳故里幸
經過停舟渡口空懷古嗚咽灘聲感恨多

十八灘

憶昨泊舟地城猶名萬安眾艇忽戒嚴為過十八灘
章貢此合流一束驚奔湍大石踞江面似欲相遮攔

小石礪鋒及波底排巒岼深潭訝莫測下有蛟龍蟠
捩舵石罅中擊刺羣篙攢遲速倘失勢倏忽性命拌
灘師偶絕叫心膽猶為寒蓬窗客愁坐歎息行路難
當年趙清獻疎鑿力已殫安得五丁役盡剗亂石頑
中流無搏擊一瀉江河寬

半日過一灘一灘數驚喘况有十八灘灘灘盡奇險
如入八陣圖重圍竟難免如工九折坡羊腸屢旋轉
小溜與大溜莫辨水深淺更有天柱灘危途尤黯慘

水與石相搏終日聲震撼聞響氣先奪并力因齊喊
進寸退已尺百夫競牽挽紆回大不快推蓬且曠覽

風靜鷺鷥閒沿灘飛點點

馮云暮繪奇險廉悍中有疎宕之致
舟中述懷

涉險嗟遊子方知行路難詩猶說惶恐惶恐灘為十八灘之一文
文山詩惶恐灘頭說惶恐即此地信敢報平安客路三千里危途十
八灘關山迴首望思入白雲端

攸鎮雨泊

松杉如沐總離披。捲地狂風忽漫吹。兩岸聲喧灘漲後。萬山雲暝雨來時。蓬窗急點驚殘夢。茅屋寒煙濕晚炊。頓覺清涼人意爽。新晴莫遣掛帆遲。

自吉安至贛州計程五百里蓬窗無事偶有所
得輒韻之成八絕句

蒲帆十幅翦江行。萬疊秋山次第迎。最好淡青濃碧處。一峯含雨一峯晴。

峯峯蒼翠映斜暉。曲徑羊腸細不分。忽漫半空樵唱落。一肩衝破崩頭雲。

林壑蒼茫雨正霏。被風吹散又斜暉。斷雲一縷無歸處。飛入船窗傍客衣。

層巒疊嶂縱吟眸。雲水光中盪一舟。忽訝蓬窗生暝色。數峯突兀壓船頭。

沿崖曲折布帆開。出得平沙暗自猜。回望雲山杳無路。扁舟不信此中來。

飛湍激浪石縱橫。牽挽連朝滯客行。此日上灘休悵

望他時順水是歸程

吉水清連贛水清江山日日動遊情每逢佳處都吟
遍好把新詩當紀程

薛云王孟詩倪黃畫合而一之

贛州登八境臺

八境開圖畫千秋勝蹟留風雲通嶺表形勢壯虔州
秀挹空峒翠平吞章貢流坡公題句在登眺一停舟

馮云嶺峒翠平吞章貢流坡公題句在登眺一停舟
雲都道中

山重水複路迢迢劫後秋榕葉未凋古岸泥高堅似
石亂灘雨足漲如潮趁墟歸向斜陽晚結寨居從絕
壁遙祇覺炎荒風景異不妨隨意紀歌謠

榕齋即事

小雨初收後閒庭獨立時夜寒孤雁警秋老一蛩知
澗曲泉流細山深月到遲垂簷多橘柚風景淡相宜
渡湘江登北山遊六祖寺

我登白雲亭遙望聳梵宇

登署後白雲亭見六祖寺在峯巒蒼翠之間佳

處留山坳一水路偏阻乘興偶來遊空濛駕柔櫓舍
舟踏山石犖确行里許澗斷微雲通林疎遠岑補天
晴朗象峯石罅滴泉乳入寺且幽憩寺名稽六祖唐
時號梵行磨碣為攷古橘柚紛紅黃累累壓堂廡老
僧掃落葉山茶湔泉煮禪房坐已暝炊煙起縷縷薄
暮歸途促嶺外月初吐忽送一聲鐘蒼茫隔煙渚

探梅歸途偕施立之建治蔣醉園考聯句並折

枝分贈叢瀛石占鰲觀察吳樵孫朝宗丁茂

齋世培孫芷香芬大明府黃貫齋經史參軍

夙有尋花約醉園探梅到水濱正逢開一樹立之不
速到三人老幹初霏雪淮生歸途共帶春幾枝分贈
去醉園好與結芳隣立之

瀛石觀察用捲簾體次韻索和

共結歲寒友原宜松竹鄰乍銷江上雪分贈隴頭春
酌韻方連日尋芳又幾人謂袁竹一諸君還應驢背跨重訪
灞橋濱

沈燮堂大令國藩和前折梅聯句並繪梅花橫

幅見贈賦謝

江邊一樹衝寒開梅花開處春風來官閣詩人動詩
興可惜健步難移裁君作梅花詩詩中能有畫豈知
能畫如能詩寫上生綃逞竒怪墨痕枯瘦妙入神逃
禪老人身外身初疑月地墮香影便與孤山娛好春
一幅相遺趣橫溢細數枝南與枝北披圖髣髴到江
邊一笑相逢舊相識

馮云氣機飛動神似兩當

硯孫從兄歿於襄陽詩以寄輓

不盡漂搖感聞君解脫時沈疴奚遠適兄夙有亂世
痼疾已長辭墨劫愁難挽黃泉痛不知人琴遙嘆逝客路
獨淒其

擾攘干戈日天涯歎隻身弟無子以堂
弟詒孫兄子鄧攸常抱痛

為奉倩早傷神是年三月嫂
氏歿於東臺遠客三十里勞生五十

春全家猶泛宅易簪辛最酸辛

一唱公無渡舟中哭失聲

兄自襄陽赴武昌解纜賈甫二十里歿於舟中

生悲賦鵬太白愛騎鯨湖畔愁青草堂前憶紫荊移

家湘水曲悽絕鷓鴣鳴

定樞後全家即赴湖南

擊楫大江橫蒼茫鐵甕城

壬戌四月同於京暫離成口渡江沂流西上

永訣入夢恍平生望遠棺難拊開緘淚已傾當時分

手處歷歷記分明

旅櫬猶飄泊艱難土一坏

元旅櫬權厝武昌

吳雲悲極目楚

水黯生愁夢破紅羊劫魂依黃鶴樓先整何日傍轉

使憶松楸

挹翠軒即事

瞥眼韶光徧天涯客思牽情深詩有債量淺酒無緣

鳥向閒中狎花從靜裏妍春陰不成雨釀濕一庭烟

陳云宋元佳句

送蔣醉園返南昌

賞菊評梅屢唱酬交因文字契深投吟豪心挾千秋

想世亂身輕萬里遊浩劫蟲沙會共歷新痕鴻雪卻

同留那堪正送春歸去又送君歸黯別愁

病起

不覺動吟興何時換物華新春偏惹夢多病易思家
入饌初鋤筍分泥更種花微風入庭樹為掩碧窗紗

春晚偶成

偶然拈韻獨敲推好景應須好句催雨過煙痕隨霧
散日斜山影渡江來天涯人遠愁紅藥客館春深閉
綠苔惆悵家園風物改可憐懷抱幾時開

大雨

疑捲江河水憑空倒瀉竒波濤千樹亞風雨一亭危
佳節黃梅過新涼翠簟知喧逐聲不斷遙識漲灘時

石城
琴江即事

四合峯巒隱似環孤城莽莽萬里間連朝積雨蛟騰
壑積雨數日滿路腥風虎過山虎自他處來者聚散
頻驚嵐瘴重卷舒翻羨嶺雲間不堪景物炎荒異何

日天涯放棹還
何云次聯雄爽

野望

寒山石徑斜

薛云餘音嬌行歌過樵者黃葉一肩挑

衝雲歸去也

出郭開眺

斗大孤城在十巖萬壑中秋風延野燒夜雨漲山洪

雨後溪水陡長俗稱山洪衰草寒猶綠孤花晚更紅鄉心何處寄

煙外數聲鴻

寂寞荒郊外閒行遣客懷橋惟支獨木屋每結懸崖

林瘦樹全禿雲多峯半埋江山感蕭瑟何事滯天涯

九龍十八灘石城險道也歸舟過此其險有突

過贛州十八灘者為賦七古一首

蕞爾小邑深山中當年開闢亦草草劈開群峽通江

河亂石中流全未掃任他水石相搏激成此危途世

應少我歸卻乘下水船疊嶂層巒苦宵窳但見旋渦

湍灘沸飛湍奮激疾於鳥森排形似衆星布喧逐勢

駭狂瀾倒百怪紛伏牛渚磯萬弩夾射馬陵道縈紆

不數九折危遲速祇爭一線巧更有龍口尤嶙峋小

龍大龍各滌繞水高何止一丈強驟下深虞舟莫保
何年廟宇祠龍神割雞漑血致虔禱入坎出坎真須
災且向蓬窗豁懷抱但看兩岸去如飛不用乘風駕
帆飽到此何愁行路難但覺急流歸去好

薛云狀奇險之景讀之使人心驚膽慄
何云倒道巧三韻絕似坡谷七古中對句

遊東湖百花洲

不須高閣問滕王城市山林趣更長洲繞百花堤萬
柳最宜亭榭水中央

蓮塘梅塢儘勾留銷暑衝寒次第遊花木四時工位
置不徒佳日在春秋

憑欄四望極空冥何處鐘魚最動聽只隔紅橋波一
曲阿誰渡到水心亭

琴牀石磴漫留題小壘峯巒不厭低更向蘇翁亭上
望綠陰穿過一條堤

宿雨初收似鏡平樓臺高下夕陽明誰家池館遙相
望長笛參差弄晚晴

遠渚蒼茫泛鷺鷗。漁舟泊岸網初收。嘗茶到此真如
畫。山色湖光共一樓。

舟中憶內

小聚纔經月。匆匆况歲闌。家貧催別易。道遠寄書難。
努力加餐飯。何人問煥寒。低頭青篛底。祇覺影形單。
病裏難為別。飢驅祇自慚。封侯君尚悔。作客我何堪。
骨肉離情重。風塵世味諳。何年遂偕隱。一棹返江南。

除夕作家書

紅燭清樽度歲時。人家團集夜遲遲。那堪旅館寒燈
下。獨寫家書話別離。

春月初霽偕同人至浮梁縣城得三絕句

寒暄正是適中初。雲斂山青值雨餘。最好春遊似圖
畫。菜花香裏坐籃輿。

桃花楊柳艷參差。客裏尋芳不厭遲。底事臨風獨惆
悵。故鄉三月踏青時。

草木春城到處荒。幾回浩劫感滄桑。多情只有尋巢

燕飛上枝頭話夕陽

陳云神韻極佳

登撫州擬峴臺和李秀峯韻

百戰孤城在巍然峙此樓幾經烽火劫不盡古今愁
山色當窗落江聲抱郭流誰追羊叔子遐想寄千秋

薛云氣格雄渾

題畫

滿湖風緊塔鈴哀兩岸蘆花雪作堆萬疊青山千疊

浪一帆飛渡過江來

陳云七絕雄渾是盛唐境界較之神韻為難

李秀峯見示舊遊廬山諸詩即用其和紫霞真

人遊白鹿洞歌原韻率成一章以誌嚮往

我昔渡彭蠡始見匡廬峯可惜風利不得泊船頭悵
望雲重重李侯有佳句題遍青芙蓉七賢五老恣吟
眺真人詡我廬山逢嗟我局促受鞿韉何時塵夢醒
晨鐘會當與君訪赤松振衣長嘯驚虬龍驚虬龍友
麋鹿石可餐霞可服舊約遊山諾不宿為我佳處結

芎屋招得匡君來伴讀

薛云清超拔俗嗣響紫霞
建昌道中阻雪越日雪霽曉行

一○夜○蓬○窗○寒○澈○骨○曉○看○千○山○萬○山○雪○榜○人○解○纜○寒○江○
邊○雪○深○沒○髀○肌○膚○裂○篙○滑○凌○寒○競○打○水○衝○撞○漸○聽○流○
澌○活○千○層○細○碎○分○瓊○瑤○一○路○瑒○琮○奏○琴○瑟○船○頭○嘯○傲○
誇○奇○觀○祇○覺○詩○情○更○清○絕○茫○茫○四○顧○真○無○涯○到○此○始○
知○天○地○濶○林○缺○俄○驚○一○點○紅○東○方○杲○杲○耀○初○日○

馮云通體清峭起結尤超絕

遊從姑山在郡城東南五里上有飛鰲峯滴翠

字於絕壁間亦奇觀也

麻姑稱福地麻姑山與從姑相去約十餘里有丹霞福地諸勝茲山奚名從

不聞大姑山小姑侍御充豈必統乎尊屈汝為附庸
攬勝自茲始勝境將毋同譬如訪佳客以此為先容
出郭二三里秀媚青芙蓉何年飛巨鰲到此成奇峯
巉岩怒欲壓古寺嵌當中偶然一舉首突兀驚雙瞳
旁有滴翠崖泉石尤玲瓏黝然油米洞府附會誇神

功厓側有油米二洞俗傳曾出油及米為錙流赫脩費亦一奇也磨厓劈窠字一一

撐青空峭壁裂一線上有天橋通想見巨靈劈生面

開鴻濛絕頂罕人跡時有仙靈蹤明當赴仙壇鸞鶴

應相逢

馮云凝鍊雄厚善學杜韓

遊麻姑山

在郡城西南十里上有仙壇即王方平會麻姑處唐顏魯公有記山中勝

境極多龍門橋瀑布尤擅一山之勝

盱江江頭十日雨夢魂夜夜遊仙府

遊從姑後即擬遊麻姑為積雨

所阻然夢至仙壇髣髴觀仙真者數矣

東風吹作三日晴許我遊山約

遊侶出城蒼翠撲人來指點仙山快先覩峯迴路轉

高入雲彩虹一道長橋俯飛湍直落千丈強下有蛟

龍不敢怒

瀑下有金龍潭其深莫測大旱禱輒應

仙壇寂寞靈風號想

像當年衆仙聚手如鳥爪髻髮垂曾擲丹砂擗麟脯

我來憑眺經十年水淺蓬萊復幾許魯公斷碣頻摩

抄落落長松更奇古

魯公仙壇記碑猶存壁間壇前古松一株相傳為魯公手植

老僧指示神功泉

澗旁神功泉尤極甘冽

餉我山茶滌泉煮花

開澗谷紛爛漫攝石捫蘿恣採取盤桓未已夕陽催
匆促歸途勇猶賈祇慚勝跡未窮探更按山圖一一

數今宵星斗空山寒夢中還向斯遊補

馮云北又似蘇長公
郡齋雜詠

丙寅冬余來建郡即居署之西齋客子光陰
已逾半載郭林宗逆旅一宿無間焚掃况朝
斯夕斯於此中得少佳趣哉昔小園賦陋室
銘摹繪物情讀之每為神往因即景成句積
句成篇遣興消閒不嫌鄙俚時丁卯五月望
日也

郡齋居西偏舊時名菜竹池館閱滄桑荒涼惟滿目
繫我客盱江蝸居於此卜折松以掃樑牽蘿為補屋
芟蕪復去穢暇輒擾僮僕竹几與繩床縱橫不嫌蹙
畫棧題新詩紙窗糊幅幅好花不知名瓶供時一束
庭除多隙地沿緣種秋菊灌溉汲井華泉甘又土沃
異草不翦除滿室映成綵橘柚已纍纍吹墜猶未熟

風雨颯然至衆卉盡如沐池水清且淺時有鳥來浴
遊魚近不隔觸手試一捉日涉便成趣矯首更遐矚
遙指麻姑山參差露屋角蒼蒼翠翠中隱約見飛瀑
園側掩雙扉幽人時剝啄閑徑望羊求往來任數數
相與忘形骸不知主賓孰說詩茶一甌節談棋一局
官舍雖諠囂此地頗不俗原知鴻印泥斯堂非我屬
閒情聊諷咏絕不厭煩複書之齋壁間後來還可續
薛云馬崇有別趙一臣惟熙大令
六月上浣將赴金陵留別趙一臣

一見如相識風流是我師才人多好色仙吏必能詩

韻事傳菱角

野人送菱角君與余均有詩

新聲譜竹枝

近賦盱江竹枝詞極

艷搏沙忽吹散愁絕掛帆時

許灣道中

雷雨初收又晚霞山漢曲折出平沙漿因水淺每雙擱
帆為風橫時一斜啣尾竹籬分客貨平頭茹屋住田
家征途百里頻回首從此江湖別路賒

馮云灘淺水涸時每有此况第四句尤妙

板子磯懷古明黃得功敗左兵處

歎息前朝事扁舟又此過強藩將問鼎同室竟操戈
天子徵歌急權奸竊柄多磯邊懷古意嗚咽付江波

雨花臺

由聚寶門經長千里許即至臺左舊有木末亭今燬

乍出長千里難尋木末亭斯臺獨高峙戰血尚餘腥
一代論人傑千秋據地形中原氛未靖哀雁不堪聽

陳云矯健

里門雜感

旅客重歸閱四年老青荒紫暮秋天一花一木多情

甚歷劫相逢也悵然

甲子秋季曾自江右回里

廬井蕭條對夕暉凋零朋舊更何依里門食宿渾無
定亂後還家不當歸

獨上秋墳又幾回傷心一陌紙錢灰年年此日豚魚
薦曾見慈親手作來

陳云語淺意深不堪卒讀

登北固山遊甘露寺

危峯獨立迥凌虛萬里蒼茫眼界舒第一江山推北

固

延陵吳瑀刻大字於壁
問曰天下第一江山

千秋形勢壯南徐孤亭直

欲超雲表

臨江極高處
有摩雲亭

鐵塔猶存歷劫餘說到滄桑

增感慨寺門憑眺意何如

馮云次辨已掃一切
遊焦山

丁卯小春阻風京口曉起至江干眺望是時
朝霞掩映雲氣連江環視諸峯皆若有若無
莫可辨識而焦山一角如在天際須臾氣清

天朗翳障悉空亟偕同人棹舟往遊片刻已
達南麓由山右旋訪焦隱處經別峯庵觀音
崖徧歷蹊徑登絕頂海天一色洵為天下奇
觀旋下山入海雲庵松寥閣諸處小憩并至
定慧寺觀周鼎漢鑪諸葛銅鼓瘞鶴銘碑皆
光怪陸離純乎古物而周鼎一器尤為罕有
相與摩挲久之無何返照入江暮鐘將動仍
返舟傍象山北固泝流而行峭壁奇峯目不

給賞是日浪靜風恬和江光如鏡有遊山之樂
而無涉波之恐爰紀以詩

曠曠曉色開扶桑水光接天雲連江一痕翠黛出雲
表虛無縹緲江中央初疑可望不可即仙山遙指烟
蒼茫須臾盡掃衆峯出快哉一葦原可杭順流十里
到山麓古木森秀羅成行盤旋至頂豁開朗天容海
色同青蒼大江浩浩日奔瀉東南巨浸何汪洋茲山
萬古流不去怒濤駭浪時春撞山腰更訪焦隱處古

洞深窈岩花香老僧攜鋤採芝朮一徑導引歸禪堂
摩挲舊物列周鼎相與考古彌精詳山門留此作永
鎮魑魅驚走蛟龍藏當年瘞鶴剌碑石字畫斷缺空
傍徨得遊名山願已慰况覩寶物神逾揚蒲團茶話
更良久松寥閣外俄斜陽出門一笑竟歸去打漿不
覺長波長是時澄江淨如練衆峯環列皆屏張中流

回望碧螺髻玉鬟招手仙人鄉

詠火輪船

詳云神似大蘇首寫曉景尤妙

嘆夷之入中國以船為最利日行千里有千里馬等名目余甲子年回里於九江附夷船至鎮江一日即至今鎮江有嘆夷碼頭火輪船多泊於此

我我千里馬西洋稱巨舸非車乃用輪涉水翻砂火首尾形如梭重樓成豁閣分房儼樓櫓排列右復左烟起聲隆隆兩旁迅轉轆上有機如衡時抗又時墮激浪拖餘波送舟尚掀播有時遇驚颺飛行仍貼妥

潯陽達揚子為期一日可豈有縮地方渾疑天上坐繫余曾乘此偏虞夷性巨憶昔嚴海防惜哉論未果遂令十餘年中夏遍貽禍深目與卷髮橫行醜徒夥聖世雖羈縻防閑毋弛惰值此時勢艱誰能勝擔荷書生抱杞憂敷陳不嫌瑣臨風一放歌江波何淡沓

登天門山

陳云工於狀物第二詩尤佳
即西梁山在和州境

煙雲萬疊望中收山勢嵯峨據上游百戰頻年餘故壘雙峯對峙束江流玲瓏絕壁懸飛閣寥泐長天接

遠洲好向征途同攬勝不妨到處儘勾留

清曉望小姑山在煙雲杳靄間

山色船頭辨有無一峯隱秀不嫌孤曉江措得明如鏡霧鬢雲鬟看小姑

薛云文章本天成妙手偶得之

江行

薄暝寒風驟孤帆江上行夕陽雲忽漏放出一峯明

婁妃墓

香土曾埋玉骨清夕陽芳草共愁生東流一片西江
水隱約還聞嗚咽聲

環珮魂歸又幾時粧樓何處覓荒基故宮木杳蒼茫
感怕讀蒼生第二碑

逆流漫說葬江波更比湘靈飲恨多野老猶傳亡國

怨插秧時節唱秧歌

馮云如怨如慕如泣如訴

抵章門即事

歸來聊共賦閒居翻悔當時作計疎
琯瑛秋風憐下

第鬱葱佳氣喜充聞時生兒已四閱月矣漫論辛苦
三條燭且報平安一紙書南時寄湖遊遍江山名勝處

此行也算不曾虛

陳云心氣和平足徵學養
何云一氣濃落語語自然

芙蓉江上草堂詩稿卷二

江陰

金武祥

泚生

戊辰春仲將赴長沙省親繞道至吉安閱府試
卷感賦

纓掛征帆便悵然連天風雨暮雲邊
奔馳客路頻千里睽隔高堂已七年
忍使桑榆違色養敢因兒女遂情牽
空囊且莫嫌羞澀尚有新詩貯百篇
可笑萍踪不自由半途鴻雪又勾留
關心樽酒懷前

度余兩經吉安吳樵生太守滿眼雲山感舊遊差喜
三湘原接壤不妨兩月暫停舟此邦文物從頭數六
一休風尚在不在

連日雨行口占

瀟瀟風雨打孤篷盡日舟行曉藹中新漲又添三尺
水峭寒斜掠一帆風含煙堤柳團濃綠隔霧溪花綴
小紅遙指前山信奇絕飛泉百道掛長虹

陳云劔南佳句

臨江道中雜詠

荇菰四五間何年在山麓溪流環其前四圍盡松竹
濃綠漬不分野桃紅一簇淙淙田水聲依稀奏琴筑
斜陽忽穿林歸雲時擁屋孤釣頽還支凌兢過黃犢
新漲偶侵門鵝鴨爭向浴老漁得纖鱗換酒往來熟
禽鳥亦忘機飛鳴安飲啄此中有佳趣蕭然遠塵俗
自嘆世網撻頻年苦拘束停舟適相值鄉心頓振觸
何日返江村幽居遂耕讀名利等浮漚一笑萬事足

何云意境清絕筆力雅近王章

題李秀峰匡山讀書圖

千岩萬壑百重泉坐對匡廬手一編遙指孤亭山翠裏抱琴應向此中眠

良遊我倘踐前盟選勝親從畫裏行記取斷崖飛瀑處尋君好聽讀書聲

輓吳樵孫朝宗太守

薤露俄傳淚暗吞茫茫天道竟誰論當年治行曾稱

最公為中丞所知特列此地蒼生尚感恩猶幸暮年歸志遂誰於薄俗古風存科名累世多陰德會見重興駟馬門

幾度螺川繫客船孟公投轄每拳拳重來又認飛鴻迹一慟驚聞化鶴年余兩經吉安時公任廬陵皆歎世之信遠道何時陳絮酒高山此後息琴弦不堪踏

何云於此昂見筆力於俯仰見性真

題李明齋

舟中書畫羅列

並有美人畫羅列

吳娃盪槳麗如仙，書畫隨身舊有緣。
佳話千秋君並擅，鴟夷一舸米家船。

風雅如君未易攀，琴樽畫舫足盤桓。
江鄉我愧蕭閒甚，只有扁舟一釣竿。

甚陳云起妙只有扁舟一釣竿

新淦道中

緩放征橈喜乍晴，歸雲斷續午風輕。
垂楊一路搖殘滴，猶向低篷作雨聲。

劇憐行旅太匆匆，傍嶺沿崖曲折通。
差喜山花破岑寂，窺窗時入一枝紅。

新喻道中

日日郵程記，驚心客路賒。
風多帆鼓腹，灘險石磨牙。
好鳥啼叢篠，遊魚噉落花。
溪山幽絕處，羨斂野人家。

馮云刻劃不纖足唐人寫景

途中雜詠

連朝疑向畫圖行，極目雲山又幾程。
最愛新晴灘漲

急綠楊陰裏水車聲

雲樹蒼茫霽色開
綠波如畫水滌洄
篷窗閒凭拋殘粒
引得遊魚逐隊來

髻髻仙源路尚賒
水雲深處有人家
此中不識春多少
流出前溪百種花

昌山晚泊

兩山中斷處
瞥見一河流
過脈留灘石
聞聲動客愁
千重村樹暗
四野暮雲浮
欲問嚴家事
悲風滿渡頭

陳云高澤

袁州道中

參差漁笛隔江聞
西崦蒼茫日又曛
亂石橫灘山過脈
孤根拔地樹盤筋
水牛帶犢浮溪漲
野鳥呼羣渡嶺雲
最喜停橈香撲鼻
岩花相對落紛紛

陳云造意鍊字
湘河舟次

七澤三湘地扁舟
又此過風塵
頻跋涉歲月易消磨
獨客憐吳語
閒吟入楚歌
汀洲有蘭芷
采采意如何

何云盛唐道響成如容易却艱難

抵長沙即事

人生有至樂天倫乃為最緊我獨遠遊望雲頗感慨
一朝遂趨庭悲喜疑夢寐溯自壬戌秋迄今戊辰歲
其間七年事并作一夕話乍見轉無語徐徐陳梗概
所嗟惟亂離重慈遠永背恐傷老父懷欲語每多諱
依依侍親側竊視增老態見兒今遠來倚閭心稍慰
憐兒走千里辛苦頗能耐謂兒縱無能樸拙尚堪愛

客中話團團雖暫亦足快祇愁室廬燬田園更荒廢
囊橐且蕭然飢驅猶不暇何當放歸舟還家日相對

菽水可承歡至樂益暢遂笑謝當時人利名安足累

薛云至性至情自在流溢非可以錢肝刻肺求也
贈詒孫八兄

久別忽相見深談到夜闌浮家千里易謀食一身難

兒女已成列杯盤聊盡歡江鄉何日返重與話團團

薛云四十字一滾而出婉孌動人

遊嶽麓山用昌黎山石韻

有飛來寺及重摹响嶼山碑六朝松諸勝

湘江江頭橫翠微，嶺頭處處閒雲飛。
四圍草木漬濃綠，遙望陡覺峯巒肥。
朝來竒興頓颯發，鼓勇不厭同遊稀。
縱遊名山愜素願，慰我未見如調飢。
澗泉林鳥弄清籟，一路傾聽窮岩扉。
飛來古寺罕人跡，未礙晨夕籠烟霏。
穹碑欲讀嗟莫辨，老松盤礴驚成圍。
何來異卉爛巖谷，往往觸手香滿衣。
煙霞嘯傲洵足樂，世間名利何能鞿。
故山猿鶴正相望，速攜遊屐將東歸。

馮云一氣清蒼押韻尤穩

雲麓宮題壁

聞道山僧宿翠微，徑來絕頂款岩扉。
白雲滿地容何處，啼鳥數聲花亂飛。
萬木蕭森生遠籟，一龕寂靜悟禪機。
尋松問石頻閒憇，不覺前峯已夕暉。

何云八玉孟集中幾不復辨

過賈太傅故宅 並祀屈左徒

此地曾聞弔屈來，城西故宅尚崔巍。
最難年少能憂國，轉為時清惜此才。
痛哭祇餘三策在，孤忠直接九

歌哀即今異代同祠字。淒絕湘流去不回。

陳云律細格高

征程雜詠

水雲深處儘勾留。曲折沿崖盪客舟。更喜山樵解人意。故拋松子落船頭。

荈茨一徑白雲通。紅樹青山望不窮。我自泛舟他結屋。大家都在畫圖中。

清江道中

榜人發清曉。一棹行空江。晨曦出復沒。凌亂餘霞光。山雲蕪然合。林壑皆蒼茫。微雨隨風來。十幅蒲帆張。春寒一何厲。酒力猶能降。擁被時復卧。未敢推蓬窗。但聞破浪聲。船底鳴淙淙。

何云此種高唱。唐以後人皆薄而不為。務欲以才力相勝。究之言情。繪景。均貴自然。若力便非佳作。第昔人所謂十首以外。語意相同。則亦詩人之一病也。

途中久雨遣悶

逆流日日滯征橈。積霧沈陰入望遙。不肯放晴天似

各○爭○先○出○峽○水○何○驕○蕭○條○客○路○憑○詩○遣○料○峭○春○寒○仗
酒○消○每○到○夕○陽○雲○忽○漏○夜○來○又○聽○雨○瀟○瀟○

王司馬邀同人春遊作

攬勝尋幽逸興添，偏隅景物亦何嫌。使君為政原多暇，
奇境能遊任久淹。至玉壺山楊柳一溪春漲賦菜
花十里午風甜，韶光易暮休輕擲。此日何期四美兼。

何云第三聯與夢龍風來餅
餅香同一機軸此尤清渾

元陽洞在蓮花廳城南

羲皇一畫開鴻濛，艮象覆碗原中空。何年鑿破混沌
竅，遂使絕境人間通。元陽古洞闢山麓，闐寂幽窈誰
能窮。水聲潺潺此中咽，有時流出飛花紅。洞泉每有
出名杏別有天地境，髣髴武陵谷。口將母同，又聞深
處多窟穴，流涎噴沫潛蛟龍。四時泉源旱弗竭，灌溉
萬頃資神功。洞門奇石逞妍怪，劔戟相向鉞交胸。鸞
翔鳳翥狻猊扶，倒懸突出驚雙瞳。森然動魄偶長嘯，
響答直似鏗洪鐘。其旁指點巨人趾，洞天信有仙靈

踪誌稱楊筠松脩真於此洞旁巨人趾其遺跡也脩真當日競韜晦繫我欲
往嗟難從歸途回望三歎息烟蘿蒼翠雲重重

馮云岑巖奇境令人意駭神悚起結尤佳

安福道中

雞聲茆店五更初一片紅霞漸卷舒底事曉寒偏料

峭山雲重疊裏籃輿

新晴莫漫悵征途疊嶂層巒儼畫圖過雨看松最奇

絕釵頭萬顆綴明珠

何云未經人道

吉州試院重九馮子良先生詢賦詩索和韻

二首

豈有登高作賦才論文且喜共銜杯雁聲忽報秋將

老鴻爪曾留客再來

去歲春間亦在院勸校

千里相逢萍水合

重陽又見菊花開新交舊主殷勤甚送抱推襟日幾

回

詳云亦沈若亦清起洲應詩中十字見之作

節義文章夙所崇此邦教澤溯流風秋聲誰賦歐陽

子正氣猶存信國公賴有汝南精月旦定知冀北快

群空丹黃偶暇揮吟筆餘勇爭誇矍鑠翁

子良先生酬詩二律和韻奉答

跌宕湖山自在身超超大雅獨扶輪文章名世無餘

子治譜傳家有替人今似也需次縣令桃實長添方朔壽梅

花近接嶺南春更欣三度重遊地一度風光一度新

健筆能將萬象包漫勞酬韻費推敲聞名久已欽詩

伯湘鄉侯相寄書述祖何期本世交與先大父為

飛將文壇真大樹程材藝苑重前茅已年同歲生指日歸橈

放回首園林肯暫拋

張君小琴惠詩五章即和原韻奉答

客邸何堪歲月催幸逢舊雨共追陪壯懷漸向風塵

老好句都從閱歷來酬韻又添詩草富衡文更見榜

花開取列前茅者有重陽莫作登高賦且盡筵前濁

酒杯

靜山觀察囑題耕讀圖冊頁

菴齋小築傍清溪坐對雲山當畫題遙指煙林蒼翠

裏有人叱犢過橋西

把卷吟哦興正長更勞晴雨費商量披圖忽憶江南
路耕讀傳家舊草堂

甘棠種遍水雲區豐稔頻年萬斛腴項士樂詩書農力
穡妙將風俗繪成圖

李明齋出示所畫梅花巨幅囑題七古一首

李君卓犖人中豪承家七葉綿金貂平生嗜古有奇
癖商彝周鼎窮釐毫丹青妙筆擅風雅文與可竹王

維蕉就中梅花更高古脫手百幅圖生綃有時秀潔
絕塵汚藐姑仙子來碧霄有時大氣鬱磅礴孤根鐵
幹如蟠蛟淋漓潑墨恣揮灑頃刻春意盈堂坳暗香
疎影欲飛動定有老鶴來相招祇我披圖轉惆悵江
鄉萬樹開瓊瑤自從四載歷兵燹雲階月地空魂銷
迄今欲歸歸不得惟有傲骨存丰標感君殷勤數相
示囑我題遍寒烟梢要知此中有真意歲寒三友同
訂交一枝他日倘相贈更向枝頭著意描

薛云似香蘇山館中得意之作

小春十日陪子良先生麥味榴太守錦鑾明齋

遊青原山子良先生成詩一章奉和原韻

龍湫虎穴在寺旁祖關開攬勝同登舊鏡臺流水亦知

宗派別名山未許俗人來參天尚有千年柏寺多古柏皆唐

宋時題壁先吟十月梅時明齋畫梅將刻石壁間顏

公李伯文文黃山遺跡在為摹殘碣幾徘徊

何云僕有游青原山記並前後六詩意謂不負此山不意先生復得此佳句

遊青原歸途復成七古一首用昌黎謁衡嶽廟

題門樓原韻

牽纏踪跡勞天公十年走逐塵埃中一朝行樂頗自
喜詩壇酒社心先雄好遊不覺更成癖有極必造源
必窮青原自昔擅名勝遙遙七祖開宗風泉聲到耳
徑彌曲細澗中斷虹橋通古柏崛強鉢龍起崖枯石
瘦空山空嶺雲團絮日卓午小春天氣何融融先生
杖履仙吏烏歡喜合證獅王宮摩挲碣石辨唐宋風

雨剝食苔花紅，覃溪學士精核古，禪關奇字乃折衷。
顏魯公隸書禪關兩大字。禪即祖字，學士考辨甚悉。山中老僧了無事，迎門合
十頰鞠躬藥樹堂前論忠孝，英雄仙佛將毋同。明季方公
密之名以智披緇後，荆花再開師再至，我聞生滅環
住持於此，建藥樹堂。荆花再開師再至，我聞生滅環
初終。祖師圓寂時，倒插荆樹於興亡，飽閱彌勒笑，歷
劫不壞誇神功。登高憑眺興未已，蒼烟紫霧紛朦朧。
歸來夜色淨如水，片月飛上遙岑東。

將旋蓮廳留別張小琴

何幸風規接老成，五旬重聚倍心傾。人能孝友多真
性，詩到和平是正聲。已向詞章投臭味，更從道義見
交情。不堪同是離家客，臨別殷勤百感生。

何云第三句自是定論
以詳云自道所得

永新道中

萬松夾道立，曲徑通盤旋。澗泉雖漸涸，細響猶涓涓。
微風一以動，相和如箏弦。半日出深林，開朗始豁然。
忽見野人居，近築南山前。屋後出白雲，縷縷輕於緜。

紅黃間深綠，古樹經霜妍。其下積落葉，葉上聞牛眠。
雙角群鴉栖，翔集何安便。農功既已畢，露積圍村邊。
滌場淨如鏡，兒童舞翩躚。微聞犬吠聲，渡口歸漁船。
行客欲投宿，下榻居西偏。春出新杭香，炊飯寒生烟。
山肴兼野菽，味美逾珍鮮。談笑值鄰叟，樂說今豐年。
把酒樂陶陶，相與忘塵緣。出門望明月，已掛松林巔。

何云田園詩自以本色為佳不事渲染
薛云起結尤見章法

璐江道中

層巒疊嶂水迴環，魚鳥親人意自閒。白雨橫飛泉出
峽，赤霞高擁火燒山。松林陰翳二三里，茆屋欹斜一
兩間。劇愛倪黃留畫本，船頭看到夕陽殷。

何云結處有餘興便有餘味

陽江舟次

霜天木落正紛紛，樵唱漁歌一路聞。亂石縱橫攔去
水，奇峯突兀攫歸雲。禽幽吭引新翻曲，樹老皮皴古
篆文。倚棹頻來最佳處，此間真箇絕塵氛。

薛云新詞錄

白堡小泊 春間曾泊於此

雲水光中幾度經，渡頭日落漸黃昏。
危灘激浪疑龍鬥，怪石懸崖似虎蹲。
橘柚盈筐香入市，松杉成幄暗藏村。
今宵繫纜垂楊岸，記否春初舊漲痕。

陳云似甌北得意之句
謁王文成公祠二十韻

有用方為學，經綸仰大儒。
良知賢聖紹，偉績古今無。
策早籌邊展，忠因抗疏誣。
遷璫禍烈教，化峒苗孚。
章貢新開鎮，雀符迅比誅。
詰姦編保甲，選士立兵符。

劇盜都綏靖，強藩又覲覩。
倉皇聯義旅，慷慨奮前驅。
入蔡擒元濟，從天降亞夫。
窟先燔狡兔，陣果獲雄狐。
威武猶懸印，危疑竟獻俘。
君心能上格，民困賴重蘇。
懋賞封還靳，平蠻志更劬。
浮言群小謗，盡瘁蓋臣軀。
功業文章並，勳名智勇俱。
韜鈴邁韓范，宗旨異程朱。
祠宇留前代，風雲想壯圖。
千秋昭信史，一束薦生芻。
曠世誰堪媿，書生豈遂迂。
當年諸葛相，志事兩無殊。

長箴泊舟晚眺

白雲如帶束山腰，暮色蒼然景寂寥。
廟破枯藤盤作瓦，岸頽僵柳卧成橋。
林間鬥鵲每雙隨，波面遊魚時一跳。
長短堤邊聊繫纜，可堪落木正蕭蕭。

陳云寫景逼真三四尤妙

送別錢榆菴

凜凜歲云暮，嗟君何所之不諧。
惟世俗難賣，是歎痴棋換，頻翻局囊空。
只貯詩湛盧，常拂拭飛躍會乘時。
我亦牢騷客，同茲汗漫遊。
放懷憑縱酒，作賦怕登樓。

異地難為別，孤帆不可留。
明朝相送處，離思滿江頭。

何云有格律
贈周鈞甫時庚午七月同客金陵

不灑窮途淚，艱難卅載嘗。
危言動君相，奇氣發文章。

君以布衣應詔上萬言書並歷說曾李二相
天下正多事，斯民劇可傷。
憂

時同一哭，漫說少年狂。

秦淮燈船歌

秦淮風月真無價，燈火笙簫常徹夜。
古來桑海有遷移，此地繁華無代謝。
夕陽欲下鍾山青，相攜載酒登

吳舫紅欄四面，棊几淨碧波，掩映多麗人。碧波十里，
橫塘路打槳，先來桃葉渡。東船西舫各爭妍，宛轉沿
流，屢迴顧，萬點明燈暮色。蒼儘燒高燭，照紅粧水上。
琵琶獨清激，兩頭歌管，聯成行姊妹，鄰舟互相喚賭。
酒酣歌夜，將半嬌喉微度，口脂香鬢，邊花氣交凌亂。
是時浩月方正，中水天一色，金銀宮夜遊，達旦不知
倦。珠圍翠繞，迷西東，回首當年流戰血，烽燧連天照。
城闕至今兩岸，瓦礫場鬼火高低，餘白骨，浩劫紅羊
歷歲年，遺黎多少，斷炊烟似聞，遙指中流說，一夕應
須百萬錢。

遊金山放歌一首時大興土木官為重脩

乾坤奠定分鴻濛，浩浩萬古江流東。海門直下孰砥
柱，金焦對峙專其雄。古來形勝稱絕險，豈獨吟眺遊
人供。茲山中流久炫耀，樓臺金碧圍梵宮。豈知華靡
造物忌，一朝遂付秦火紅。我來登眺覽陳迹，磴道曲
折盤虛空。長江萬里若指掌，奇境自足開心胸。異哉

世俗謬裝點廢寺重創窮人工更勞監督動官府鉅
費百萬規模崇吁嗟江南歷兵燹瘡痍遍野落哀鴻
地方元氣久難復海疆况復當要衝縱令夷艇入腹
地羈縻乏術惟包容民瘼弗恤忘隱患徒事玩賞何
夢夢腐儒作歌當芻蕘敢擬憂樂天下同安內攘外
果清晏太平潤色吾亦從遊山他日更踐約且欲題

句追蘇公

何云少陵悲歌香山諷諭不圖今日復見謙言
張少槎明經廷壽步前韻和詩疊韻奉答

石頭煙雨紛冥濛一棹催發秦淮東連朝風利不得
泊破萬里浪心猶雄扣舷歌嘯蛟蜃匿下筆驅使烟
雲供水天一碧渺無際直疑吹到蓬萊宮中流陡起
浮玉島朱甍碧瓦排青紅停橈拾級造絕頂振衣千
仞凌秋空海天四顧發遐想曠然民物橫心胸同遊
張子盛文藻夙擅三絕詩尤工遙吟俯唱供揮灑豪
氣壓倒岡巒崇登高忽復動鄉思一聲怕聽天邊鴻
回憶瑣闥共文戰如臨大敵攻梯衝偏師一角或制

勝甲兵數萬，吾能容功名。要識關氣數，仰視天道寧。
夢夢即此攬，勝互酬答登。瀛他日將，毋同窮通得失。
何足論神仙富貴安，適從臨風且與豁懷抱。鈞鰲吾
欲隨任公。

何云無斧鑿痕，有金碧氣，髣雲樓閣不藉人功。

秋闈報罷鈞甫之浙道經里門見贈二律奉答

一首

愀愀秋氣悲沈沈，秋夜長。客子鬱不樂，乃在還故鄉。

况逢瑁璫辰，曷禁摧中腸。窮途竟有偶，幸共燈燭光。
握手入酒肆，相對各傾觴。朗誦別後詩，意氣猶激昂。
感子窮益堅，卓哉詣力强。惟念從此別，世事嗟茫茫。
臨別聊贈言，願子中心藏。元音追太始，仍貴諧宮商。
更有繞指柔，本出百鍊鋼。狗時豈屑為，背時用豈臧。
君子持其平，為圓非毀方。養氣以有待，干鎔韜鋒銑。
遇合倘得志，設施道自光。書生無實用，俗論多謗傷。
相期雪此言，此書會可償。天涯若比鄰，行矣無相忘。

陳云持論明通，後段語尤高宕。

秋試報罷久滯里門感賦

跋浪仍歸點額中，依然稍稟對秋風。
學荒敢惜求全毀，遇蹇惟成得半功。
卷為第六房張晴江先生所薦莫向文章論得失，要從氣數驗窮通。
即看多少青雲客，知否投時語盡工。

盡工

題湯衣谷明府裕皖城舊遊圖

不盡天涯感，相思可若何。
兵戈消歲月，朋舊遯山河。
名士鄉關重，奇才幕府多。
諸君皆在湘鄉幕中，而方君元微劉君開生趙君惠

甫皆常州人皖江江上路，回首一悲歌。

我亦牽離緒，披圖憶舊遊。
浮雲千里夢，流水半生愁。
落落文章契，茫茫湖海秋。
得君差慰藉，客路更何求。
偕嚴星樵劉允仲遊也園，造北極閣，登曠觀亭。

遇雨

欲雪不雪寒風驕，老梅耐冷初含苞。
同遊三人來不速，白雲山頂如相招。
傍山小園足幽趣，數弓隙地容誅茅。
山房少憩蓄全力，一氣遂造前峯高。
亭前曠觀

動遐思近自明季湖六朝繁華極盛歷千載可憐盡
付一炬焦我曾按圖攬名勝但見瓦礫湮蓬蒿古來
石城擅雄鎮九十五里誇兼包公麼竊據幸掃蕩光
天化日兵氣銷禪堂茶話感桑海相與憑弔空蕭騷
雨聲催我下山去浙瀝響遍寒林梢歸途無賴一回
首煙霧迷離入望遙

薛云波瀾老成情景兼勝
何云一起清峭稱題

登翠微亭

翠微亭畔草離離獨客登臨意自悲千里河山原鞏
固萬家黎庶尚瘡痍荒郊寂寞餘殘壘落日蒼茫捲
大旗使相南來重秉節可能江左仗安危

辛未三月於舊基築室數楹落成賦此

湖海茫茫幾度經又從故里寄浮萍亂餘更喜逢時
稔人傑原須仗地靈猶幸親朋共鄉井固應詩禮紹
門庭數椽漫說需材急棟棟還宜貢

帝廷

回思舊事感滄桑
辛苦艱難十載嘗
未遂萬間成廣廈
且從千里慰高堂
謀深菽水經營早
話到田園意味長
何日三湘放歸棹
團團一室快稱觴

木蘭生意未全摧
曾見慈親手自栽
百劫尚留先澤在
羣花應喜主人來
一枝秋老還攀桂
十月春融好在梅
後起漫占多富貴
落成時節牡丹開

雲香水翠穩幽棲
吾愛吾廬任品題
剌咏有時驚犬吠
游行隨處聽鶯啼
農閒歌起荷花蕩
耐市散人歸

楊柳堤村最愛夜
來新月上鳴榔
船到小橋西

游獅子林

倪迂古高士胸中富
邱壑結構擅佳妙
豈特清閨閣
惟茲數畝園氣勢鬱
磅礴淪漪繞迴溪
曲折渡短約
縱橫七二峯妍醜紛
綺錯翩如驚鴻翔
猛如鷲蟲搏
肅或如丈人執事矜
儼恪靜或如處女臨
鏡自梳掠
高低已冥迷諦視益
駭愕顧右既失左且
前復且卻
周遭旋磨蟻薦樾穿
林攫遊人偶相逢招
手但唯諾

咫尺不可通始悟循途各似近偏縈紆似隘實開拓
卅六洞中春問自何年鑿倚岩森長松攬翻虬龍躍
歲久盤孤根根石互包絡風清月白時定有歸來鶴
幽花綴藤蘿時時發紅萼亭臺雖無多那有塵氛著
獨存魯靈光劫火未容燦繫余來吳門楓橋曾夜泊
城市厭喧囂何地憇行脚偷得浮生閒言尋此間樂
撫景空徘徊古人不可作感此悲秋懷空階聞葉落

偕周星堂大令遊半山寺陟謝公墩

佛寺重開淨劫塵薄遊訪古到城闈一墩自占江山
秀千載常懷晉宋人墩為謝太傅圍棋處嘗與王右軍登此超然有高世之想宋王荆公詩所云不應墩姓尚隨碁局荒涼雲寂寂澗泉
清冷石粼粼登臨亦有超然想可許幽棲共結鄰

薛云通體雅潔次聯尤能渾括

句容道中

岡巒重叠鎖寒烟策馬長途趁一鞭衰草接天迷野
燒小橋橫澗咽山泉田園寂寞秋風裏城邑荒涼夕

照邊多少瘡痍猶未復不堪攬轡重流連

茗溪雨雪歸途口占

踏碎瓊瑤興未孤連天風雪認歸途入門笑指梅花
說忍聽寒宵伴鶴雛

薛云清極不知寒

送夏威如明經回江陰并贈折枝梅花

折贈寒枝氣味親江城猶幸接芳鄰君山消息憑君
問劫後能蘇幾樹春

君山舊有梅花書院

郡城歸舟

歸舟已昏黑溪水一條明何處是村落遙聞犬吠聲
計程剛十里欵枕漸三更值此歲云暮匆匆笑此行

陳云幽峭

除夕述懷

轉徙天涯朏十年故鄉歲月又頻遷哀門漫許高陽
里薄產猶餘下溼田菽水經時違色養妻孥遠道倍
情牽一杯且飲屠蘇酒話到團圓意惘然

壬申春初至江陰夏詠熙先生陳子懷太守皆

以河豚招飲適病瘧不果往作此解嘲

我舟抵暨陽雪霽媚晴旭君山如故人遠迎青一角
繞郭有長江魚美夙風俗將欲下陳榻又喜來夏屋
兩君夙好客適逢春酒熟云有西施乳來飲東坡腹
河魚以豚名其肥且勝肉我昔常垂涎今擬恣所欲
無端瘧鬼來似妒我口福我當以術驅更把杜詩讀
人謂子胡然此疾幸相觸河豚當春初味厚每蘊毒

土人飲江水食之且化速君今久離此水土恐未伏
老饕若無厭中毒或罔覺江湖魴鯉多何必嗜茲獨
瘧鬼比諍臣暫至不庸逐我聞始釋然一任主人促
凡病從口入斯言願三復

陳云辨才無礙酷似隨園

春日里居即事

敝廬甫重創方慮將遠行偷閒忽半載僻處無勞形
兒時釣遊地劫後彌有情山色不嫌遠空翠東南橫

村旁一條堤楊柳何青青過橋每獨往到此常聞鶯
千畦香藹間叱犢看催耕荏苒惠風和四野開春晴
溪邊搗衣石新漲上幾層歲時偕里老足跡偶入城
歸舟倏昏夜村犬遙吠迎遊行既自適入室尤足賡
甕頭多宿春潔白炊新杭盤殮雜蔬笋其味腴且清
水鄉兼近市時有鮮魚烹量淺復耽飲往往醉不醒
開卷或吟諷間以免啼聲索笑轉投懷頭角憐崢嶸
小院晨葩妍折取供膳瓶及時播花種一雨萌芽生

春氣愛和煦草木都芳馨綠陰壓檐重飛絮繁簾輕
茶甘睡初足香燼詩初成遲遲日正長燕語喧空庭
向晚倚南窗樹杪搖疎星隔牆辨人語光閃鄰家燈
誰與共岑寂晨昏偕阿兄物理能靜參自盲心非盲
謂詒孫兄况有謝家女婉孌方歸甯謂適陸氏姪女阿咸善解紛
鄉里平不平謂姪林姪有叔來豫章迢迢千里程有弟來
自皖且喜匝月停蘭岑叔菊人弟於半月內先後旋里各述亂離事情
話忘深更遠交二三里過從舊日朋董生既溫雅

秋吳子尤樸誠謂吳南湫近訪戴咫尺興可乘粵海
艷歸裝奇遇誇滄溟謂戴子快哉此閒暇高卧原足矜
惟念從此後難免塵網撻明年在何處又恐如浮萍
所冀奉老父歸養安蓬荊舞綵學萊子含飴弄孫
曾天爵自可貴不羨人世榮聊記今日言以為異日
徵誰歟鑒此心白雲當空明

陳云家居之樂摹寫盡致令人神遠

三月三日集蘭亭序字成五言一首

今人多集字為楹聯鮮有集字成詩者暮春
之初同人以蘭亭脩禊四字分韻不拘體格
各成一詩余拈得脩字

昔賢不可作稽古懷風流山林或寄興至樂咸猶猶
快哉風日和娛此水竹幽觀時一以慨悲感亦有由
當世若能喻相與期自脩至今仰盛會信將隨天游

贈薛慰農觀察時雨

六代江山一寓公幸從座上挹春風官曾杭帥同坡

老家近滁州號醉翁入寺禰檀參密諦近與禰檀盈
堤新柳護芳叢白門新柳記所年來添得吟懷健更
菊光陰興轉融

山斗聲名仰望尊漫勞塵市枉高軒簪纓敢謂金張

族杞梓都歸薛下門主講惜四海衡交增感觸馮子

廉舫兩太守一編述祖託評論承校先祖無心

均先後下世均先後下世喜傍閒雲懶山色清涼笑語溫居清涼山下

王雪香明經於庚申秋與余同避亂於松江之

漕涇維時雪香挈眷僑居余倉皇浮海今歲

重過白門患難追思作此寄慨

十二年前事相逢值亂離攜家君且住航海我何之
幸有生還日何期再見時滄桑一振觸情話不勝悲

陳云一氣貫注情深文明

登鷄

登雞鳴山入寺小憇

禪關寂寂徑通幽步上雞鳴最上頭

恨在朋左虛堂高吸一湖秋寺俯瞰逢奇石向人

立時有閒雲隨客留莫到臺城增感慨臺城離山最近擬往遊未

果登臨且與豁吟眸陳登臨且與豁吟眸

題趙荏舫孝廉從僖贖稿為令弟莘野明府作

當年樂事說天倫遺稿重搜漬淚痕千古文章悲浩

劫一編心血護忠魂孝廉於丙寅秋殉難奇才定斫王郎劍逸



韻猶傳伯氏墳此後殘篇倍珍惜長同正氣塞乾坤

吳晉士部郎唐林見過訪並示詩集賦贈一首

片帆東去悵離群昨趙敬甫返常熟獨向秦淮客感紛六代

江山空攬古十年湖海始逢君珠光劍氣才無敵傾
蓋班荆誼最殷待得蘭陵春酒熟鄉關重與細論文

渡江

又出橫埧口中流望渺然沙痕分斷港帆影落遙天
風細晴雲縹江空落日圓倉皇爭北渡猶憶十年前

雨阻橫埧市

小市開江岸沙堤四望遙煙波繞廿里風雨又連宵
泥爛塗蓬壁潮乾涸板橋何當春水發歸去放輕橈

甲戌春初赴羅墅灣

鱗鱗侵曉歷坡坳不用輕航泛綠波風日晴和逾卅
里岡巒重疊跨三河應璩港德勝孟瀆三河經春攬為郡北入江三大支流春攬
景年光換觸境思親涕淚多二十年前板輿侍牽衣
此地幾回過

童時舊事不堪論。就傳曾從通德門。四載滄桑前度
認百年喬木幾家存。盈階蘭玉綿先澤。入社鬚眉仰
達尊。謂厚菴晉太息渭陽餘碩果。那禁情話到三更。

春遊至繖墩觀梅

江南十日春風顛。三十峰爭呈妍。遊心一發不可
過。如馬縱。箭脫絃。平生名勝愛周歷。家山咫尺寤
舍旃。譬猶珍錯。饜山海。蒔鱸鄉。味倍足。憐舜過秦望
日相對。城東佳處尤情牽。砂山定山二山缺。繖墩哭

起高逾拳。兩獅對峙作毬戲。雙龍挾走同珠圓。上有

古洞深復黝。下有湖水清且漣。洞名珊瑚洞。湖不須

弔古動感慨。寰宇記云吳王攬景自足供流連。况有

梅花萬千樹。環山一白何綿延。羅浮世界香雪海。神
迷骨醉疑登仙。就中古梅作花祖。鐵幹蟠屈生何年。
深林一入誤。向背左挹右拍空。盤旋惜哉林逋未見
此。只今豔羨西湖邊。乃知名花與勝境。附驥亦賴高
人傳。此花此境久聞寂。我來一笑非偶然。良遊既踐

山水約會當築屋林巒巔蒼松翠竹並羅列結鄰三
友應宿緣詩成更向老梅說可能脫去塵俗追前賢

包公彥學博棟成見贈長古作此答之

昔我攬勝城東隅老梅花發香滿湖

甲戌春曾遊人
繼墩湖觀梅

事卒卒興盡返惜哉未訪高人廬

所居長涇離
繼墩約十里

遲速亦前定失之交臂曾遇塗傾心一見似相識性

有同嗜德不孤搏沙聚散祇俄頃多感貽我雙鯉魚

新詩滿幅惠復辱如耀錦繡鏘瓊琚縱橫逸氣溢毫

素希踪太白凌髯蘇自慚弱冠逢喪亂不殖將落空

嗟吁網羅散佚敢自懈冀紹家學回時趨

近輯先代
遺文付梓

先生好古屏俗尚等身著述勤蓄畬

所作詩賦一編
先後刊行

乃許善菟討相視而笑若合符方今龍飛下明詔

旁求俊乂尊師儒維君碩學漫高蹈相需殷豈相遇

踈雍容揄揚際。

盛世別裁偽體大雅扶此詩此語試相質以為息壤

其可乎

贈龔少漁大令長思

移家愛向六朝居，花滿江南奉板輿。寓居秦淮，迎養太夫人。海循聲傳太守定，山學術繼尚書。芝麓先生六世孫。慨歎曾策攬轡，澄清願豈虛。攬轡集。我為蒼生乞霖雨，梓邦先蒞使君旗。

寄懷姚秋坪刺史楊曙劉雪子通守垂裕嚴星

樵大令整許午樓孝廉時中卞晉卿明經乃鈺均於秦淮作平原十日之飲者也

風流幸接令公香，畫舫清尊樂未央。梅瘦菊肥桃李豔，與君十日費評量。

回首歡場動別愁，津亭相送感綢繆。隋堤烟柳秦淮

月和作江天一片秋
薛云於感慨中作興會語大難揚州即事

鴻雪遊踪到處綠，不須十萬說腰纏。者番騎上揚州鶴，只與琴書共一船。

爐香茗椀稱清遊，穩泛輕舟狎鷺鷗。一片殘荷兩行

柳虹橋西去好尋秋

高堂重向蜀岡開，秋色澄清絕點埃。
試豁吟眸成一笑，青山隨我過江來。

瓊瑤遠寄墨猶新，過訪壺園迹已陳。
廿四橋頭一回

首空留明月弔詩人

過壺園弔何廉昉太守

過梅花嶺謁史閣部墓

只有揚州路，梅花歷劫存。
當年動詩興，此地伴忠魂。
世界冰霜老，風塵戰伐昏。
生前家國恨，過墓怕重論。

滕王閣前毀於粵匪之亂，上年重建甫竣。

有客棹棹遊南昌，三度訪古悲滄桑。
眼前突兀忽見此，依然高閣開滕王。
昨由機船沂揚子，一日千里來潯陽。
天時人事偶然耳，豈必神助邀馬當。
偉哉東南擅名勝，嵯峨傑構遙相望。
題詩黃鶴有崔顥，七字壓倒李白狂。
岳陽作記念憂樂，希文道德兼文章。
地以人傳尚舉例子安，一序敢頡頏。
何況持論尚器識，徐箋庾賦曷足臧。
乃知閣公實好士，大會賓客華筵張。

一朝捧袂被容接揚眉吐氣已激昂群公未賦堦焚
稿天才遽復廣坐揚鍾期揚意寓景慕得一知己名
益彰黃金築臺重聲價巍然此閣堪比量祇我登臨
縱遊目莫更憑弔搜枯腸仙人帝子不可作俯仰一
世誰短長但見山蒼蒼兮水茫茫江頭日夜風浪浪
薛云慨想閻公別有寄托一結尤有遠神

虔州贈俞芝恬大令敦培

曾與寒梅共結盟

甲子余輯湘江探梅唱和稿承和以詞

十年重聚倍

心傾才人舊按紅牙拍見贈所著藝雲詞倦客新憐白髮生
南國棠甘聞卧轍前補樂平縣轅所屬權篆幾遍北堂萱老快稱
觥雙江水碧崆山翠照向恬園分外清所居恬園甚饒花木

虔州即事

芳訊初傳嶺上梅落帆又向鬱孤臺渚清沙白雙流
合日麗風酣八境開巒翠空同新著雨灘聲惶恐舊
聞雷計程駒歷三千里多少雲山過眼來
形勢從來說虎頭登臨易動古今愁盧譚霸業懷陳

迹聞粵岩疆控此州。戡亂奇勳高一代。王文效忠大節並千秋。明唐王時萬公元吉楊均在此殉節幸逢四海烽煙息。誰念遐方伏莽留。

朋簪差喜聚天涯。臘去春回感歲華。高叟文章開講

席。高小岑太守延綬蘇翁父子擅名家蘇澤珊大令

似儷笙直。鷓鴣詞唱鄉心切。江晚正愁余山深聞鷓鴣

蝴蝶圖成客夢賒。潘鴻卿二尹文最是怡園觴詠盛。

昨宵羯鼓為催花。招飲怡園

漫與坡仙踵後塵。此邦攬勝往來頻。山中自古有明

月。薛向空山弄明月山中木客郭外至今無逸民。東

至虔州訪陽玉岩有詩云西郭榕倚荒祠空閱歲。靈

廟有大榕二株。蘭尋絕巘遠藏春。地產蘭窮經更向

皇初溯可有奇踪。贛巨人。贛巨人見山海經謂贛以

記云南康有神名山都形如人即贛巨人也

章門喜晤孫子成明經縉

昔年仙侶記同舟。揮手天涯汗漫遊。一葉居然逢大

海百花聊共覽芳洲。晤後一日即江聲南浦流歸夢。

雲影西山澹客愁。試上滕王高閣望。古來題句幾人

留。余先成滕王閣七古一章君立和原韻

風塵到處有逢迎。攜得詩囊字字清。自昔郢中傳曲

調。於今洛下想才名。先遊楚北繼至大梁雲山遊屐長無恙。花

月傾觴倍有情。好約秦淮重問渡。與君同續麗人行。

贈朱意如適

相見各恨晚。傾談慨以慷。幾經流俗險。漫說少年狂。

身世壺堪隱。近客號風塵劍有銜。奇才誰拔爾。四顧

益彷徨。

芙蓉江上草堂詩稿

下

芙蓉江上草堂
詩稿
卷下
吳昌碩



NATIONAL CENTRAL LIBRARY, TAIWAN, R.O.C



國家圖書館, NATIONAL CENTRAL LIBRARY, TAIWAN, R.O.C.



芙蓉江上草堂詩稿卷三



江陰 金武祥 漑生

丙子五月自上海附火輪船浮海至廣州

惟天為大能包容。地球一顆懸當中。十二萬年九萬
里。紛紜論說誰能窮。九州以外隔巨浸。管窺蠡測嗟
昏蒙。徒聞談天侈鄒衍。未見縮地逢壺公。秦西邇年
矜絕技。以火濟水來艿艿。果然人力奪天巧。遂使大
地無不通。繫我附之涉渤澥。破浪豈用乘長風。數拳

偶見羣鳥碧。萬派忽湧朝曦紅。探源倘犯牛女宿。涉
險直壓蛟龍宮。溯從滬瀆抵嶺嶠。三日已繞大海東。
乃知彼中有開闢。利器尤擅倣倕工。祇憐荒遠阻聖
教。欲使涵育知所宗。區區猶夏本。非患會見感格苗
民同。天之所覆地所載。尊親所至道益隆。嗚呼儒生
論世弗拘泥。曠覽一洗芥蒂胸。乾坤浩蕩鎔一氣。日
月飛走懸雙瞳。倚舷獨自發狂嘯。應有光燄萬丈如
長虹。

周昞叔都轉云以健筆寫奇景豪邁絕倫
汪英生司馬云通篇氣足神完故是傑作

抵廣州即事

五千里外涉重洋。蛋雨蠻烟感異鄉。一事思量堪一
笑。我來剛及荔支香。朝漢臺空跡已蕪。呼鸞故道亦模糊。蠻夷大長降王
長。一樣銷沈慨霸圖。

周云二絕風神絕世不可多得又云兩長字天
造地設將趙劉二姓包括無遺妙甚

泛舟至花田得四絕句

中流宛在海珠圓。高下樓臺四望懸。憶得瓜州渡江日。金山一點大如拳。

清溪曲曲繞迴廊。烟雨通津水殿涼。我愛凌虛倚高閣。一株清影看桃榔。

依稀故苑想昌華。何處遺香認館娃。弔古尋芳無限感。不堪行到素馨斜。

計程十里九停橈。好趁珠江上下潮。贏得歸途忘日暮。夕陽蓬背看西樵。

周云。桂生最工七絕。僕每得一篇。輒愛不忍釋。於國初諸老中。極似漁洋。凌非斤斤於貌似而已。當茶熟香溫之際。微吟數過。令人之意也銷。

重九登粵秀山游鄭仙祠憇學海堂用陳蘭甫

澧先生見示中秋粵秀山看月原韻

我上粵秀山。時維秋九月。言尋仙翁祠。高想咀松屑。曲徑蟠危磴。交柯暗清樾。登樓快一覽。海天何朗徹。笑指籬菊幽。沃以井泉冽。陋彼花球花。俗艷鬪香雪。世事嗟營營。糟醕漫鋪啜。前佗與後龔。陳迹已湮滅。

俯仰動遐思。客中况佳節。悠悠抱此心。來與白雲說。
五嶺開文明。迄今幾歲月。後儒趨日下。詞章競瑣屑。
我我阮公來。多士懷蔭樾。作育成斯堂。經訓乃貫徹。
俎豆宜此邦。肅薦清酒冽。後起陳太邱。虛聲處士雪。
於學無不窺。嗜古過飲啜。南天有此老。統緒長不滅。
餘事作詩人。詩律細晚節。固應何水部。到處逢人說。

余甫至粵。高州何觀察書來。即極稱德望。陳蘭甫京卿云。疊韻詩無湊拍之迹。以有真意。貫注其間也。惟獎飾鄙人處。讀之汗顏。奉和一首。不

免鼓衰力竭。尤愧尤愧。

重九再疊前韻贈陳繩齋

浩浩大海風。皎皎珠江月。千里來搏沙。一見快霏屑。
芬如襲幽蘭。穆如憩清樾。交久形漸忘。談深夜每徹。
又如公瑾醪。飲之甘以冽。夙好敦詩書。素行厲冰雪。
教子金豈貽。事親菽可啜。紛華非所慕。烟雲看變滅。
感茲真氣誼。值此佳時節。相對各陶然。還向黃花說。

陳云愈疊愈妙。神似坡公。

過虞仲翔祠

逐臣遺恨說孫吳，虞苑重尋蹟已蕪。自昔孤忠儕屈
賈，後來遷客有韓蘇。投荒知己論千載，割宅空王共
一區。幸有南豐辦香祝，訶林憑弔意踟躕。虞苑改為
先孝寺，曾

賓谷方伯始
於寺中立祠

周云名士投荒仲翔實居其首次聯未經人道

汪云工切

由香港至澄海

飄然書劍又炎方，千里滄溟一葦杭。江海華夷今互

市，山川閩粵此分疆。深林怕聽鞞鞞惡，小砦驚看澀

勒長。縣志云澀勒即笏竹子要識弦歌風雅意漫將

樸陋說蠻荒。

陳云氣格在中感之間
周云次聯句法偉麗字字鎮紙可藥纖佻之病

潮州謁韓文公廟

秦嶺藍關外，炎荒萬里投。公神在天下，廟食此潮州。

蛟鱷文能約，江山姓尚留。韓山韓江皆
因公姓得名至今稱易治，

師法重千秋。

陳云堅勁蒼老
周云次聯高渾此境頗不易到
汪云是潮州韓祠

出潮州西北郭游西湖登湖山

攬勝炎荒興倍賒。波光斂灩徑橫斜。巖深古佛闢成
屋。樹密幽禽巢作家。臨水空亭足風月。有乘風待摩
月亭諸勝天峭壁爛雲霞。此湖倘被蘇公到。杭穎雌雄一例誇。

周云三四寫景
幽異筆端有舌

游白雲山

晨曦欲出光模糊。白雲在天相招呼。同游鼓勇愜素
願。火急出郭如追逋。初行田畦攬清曠。繼循山逕蟠
縈紆。簾泉重重瀉幽谷。灑然到耳塵心祛。峰迴路轉
漸引勝。丹臺咫尺高凌虛。相傳安期歷南嶽。排空馭
氣鶴翅舒。秦皇求之不可得。蒼蒼烟霧空嗟吁。我從
岩前訪遺跡。想見汲井龍為徒。九龍泉流為大小水
簾處其東南為鶴舒臺安期昔
上昇有白鶴舒翅以迎故名沐浴澗水乞神貺。食
以大棗餐菖蒲。川原城市若指掌。俯視下界憐頽愚。

茫茫大海望不極。蓬萊瀛洲時有無。但得白雲深處
留吾廬。至老不歸其仙乎。

陳云飄飄欲仙起結尤超絕
周云通首道逸自是合作 又云別有一種超妙
之致不可言說李東山蘇和仲之後君其嗣音彼
身無仙骨者未易語此

已卯季夏自廣州航海入都

鰲背鯤身指顧間壯游且喜遍塵寰八千里路風波
穩看盡東南海上山。

周云豪氣英光不可一世漉生將來功名之成於
此卜之

雲霞欲曙海天空笑指奇觀渤海東萬里波濤萬重
綠扶桑湧出一輪紅。

汪云大海觀日出大是奇景須得此奇句寫之

咫尺家山願尚違申江小住轉依依祇憐蕪菜秋風
裡行到江南未是歸 秋初抵上海

陳云三詩跌宕風華各有其勝

都門即事

金爵孤棱仰 帝廷車聲又向九衢聽盪胸東海千

重碧○放眼西山一片青○勝境頻看鼇背月○屢至金鼇玉竦問
佳期剛渡鵲橋星○以七夕抵都朋簪次第多良會黃菊將

開桂子馨

周云雄麗豪宕七律勝境

燕市狂歌首漫搔黃金從古築臺高三秋見獵心原

喜○五夜聞鷄氣自豪○挾策上書聊爾爾○時應京兆試彈冠

捧檄亦勞勞○赴吏部引見並解小陽細數歸期近

舞綵堂前晉綵驂

陳云二首似香蘇山館

重九日偕同人集陶然亭

功名世事兩茫茫且與陶然盡一觴聚首何期人萬

里○同座有自蜀中及塞外來者驚心況是節重陽○隔林寺擁寒雲

碧○繞郭山銜落日黃○差喜九衢塵土遠荻蘆蕭瑟似

江鄉

陳云情景兼深高朗可誦汪云讀之如身至其地

自通州至天津

卅里燕郊路臨流又喚船風寒潞河水秋老薊門烟
衰柳長隄外荒蘆古驛前授衣纔九月飛雪已漫天
九月二十日新門雨雪
二十五日至天津又雪

周云盛唐句法氣韻深厚中晚已不能及何論宋人深於詩者必能辨之

七十二沽水津河匯衆流舳艫忙轉漕鼓角壯防秋
蠲賑偏災至時京東羈縻異類柔海疆資重鎮翊衛

况皇州

陳云適勁

孟冬返里小住二十餘日仍赴粵東感賦

南北滄溟路迢遙萬六千瞻天纔闕下愛日又堂前
安得杜陵厦將蕪彭澤田勞勞殊未已欲去重流連
白髮椿庭健春秋漸古稀敢因毛義檄久闕老萊衣
身世浮雲感風塵列壑譏何時歸計決游釣永忘機

陳云性情慷慨

汪云四十字中幾許層折

酬鄧宰恭明經嘉綜

壯游何事悵風塵雲海蒼茫寄此身南詔烽烟行萬

里少游滇南遇西湖花柳憶三春客杭州司勛作記
詩彌艷公瑾論交酒最醇看到珠江江上月舞衫歌
扇一番新

踏青頻上素馨斜又送春歸感歲華儘有風情餐荔
子好尋清夢到梅花南來陸賈盈珠貝東訪安期覓
棗瓜我愧江郎才欲盡敢將險韻鬪尖叉承題拙稿

依韻奉和
周云大復滄溪學六應十子有此雋永

雜憶鄉居成三十首即以自題一序山人耕讀

圖

招隱聊憑尺幅圖祇慚浪跡遍江湖舊時鷗鷺應相

憶詠鯉橋頭一釣徒橋在村南余舊有詠

百年喬木半滄桑耕讀還開舊草堂最喜椿庭常

矍鑠白頭猶為課孫忙

連天風雪記歸途曾與寒梅伴鶴雛料得此時虛幌
倚梅花丰格雪肌膚

春歸三月感韶華。細譜羣芳興自賒。姹紫嫣紅開遍。

了幽香繞。放木蘭花。木蘭四月開花。藍瓣白心。如蘭而小。香亦清幽。先慈自崑山親中家移植。高已逾丈。亂後竟萎。根間復茁。小株分栽數處。枝幹如大木。而花如香草。城邑園圃中無此也。

親中家移植。高已逾丈。亂後竟萎。根間復茁。小株分栽數處。枝幹如大木。而花如香草。城邑園圃中無此也。

也種。周云。漁洋詩中。偶用雨絲風片四字。論者病之。南北曲語。究不宜入詩。然佳句自不可沒。

昨宵雷雨。又朝霞采采。紅蓮水一涯。更愛連畦珍果。

熟筠籃爭摘。灑金瓜。村南有池。荷花頗盛。白皮瓜遍有黃點。名灑金瓜。產大岸者尤

美甘。水土清腴。物產徵老饕。猶喜酒能勝。菊花正放。香杭

熟。五爪金臍。獨艷稱。吾鄉蟹有玉爪金臍之名。蓋水

實也。黃尤充。巨口紅腮。蝦虎鮮堆盤。烏菜說金錢。宦游也。比鱸。莼

憶歲暮。冬寒欲雪。天。蝦虎長五六寸。食蝦。故名。蝦虎天寒以棉裹之。無水亦活。味甚

鮮美。金錢烏菜。雪壓。尤佳。均為吾鄉土產。

桃花。瑯港遠通渠。一水滌洄正雨餘。好是月明風靜。

夜石橋西畔。網銀魚。村西有河。石橋跨之。水極清。澈常產銀魚。此河通桃花瑯港。二

夜石橋西畔。網銀魚。村西有河。石橋跨之。水極清。澈常產銀魚。此河通桃花瑯港。二

夜石橋西畔。網銀魚。村西有河。石橋跨之。水極清。澈常產銀魚。此河通桃花瑯港。二

夜石橋西畔。網銀魚。村西有河。石橋跨之。水極清。澈常產銀魚。此河通桃花瑯港。二

夜石橋西畔。網銀魚。村西有河。石橋跨之。水極清。澈常產銀魚。此河通桃花瑯港。二

夜石橋西畔。網銀魚。村西有河。石橋跨之。水極清。澈常產銀魚。此河通桃花瑯港。二

夜石橋西畔。網銀魚。村西有河。石橋跨之。水極清。澈常產銀魚。此河通桃花瑯港。二

夜石橋西畔。網銀魚。村西有河。石橋跨之。水極清。澈常產銀魚。此河通桃花瑯港。二

夜石橋西畔。網銀魚。村西有河。石橋跨之。水極清。澈常產銀魚。此河通桃花瑯港。二

江口惟潮
遠不至耳

周云與漁洋好是日斜風定後
半江紅樹賣鱸魚一聯孰優

扁舟如葉泛清溪宛在中流記筭泥划到青魚浜裏

去小橋穿過不嫌低青魚浜為南橫河支流由黃宕
橋西北行曲折至常澤橋計五

六里中多木杓石缸頗礙舟行惟鄉間
泥船往來頗便所謂野航恰受兩三人也

碧水滌洄綠樹連新秋尖岸已芊芊村前尖岸田形
家謂其尖如筆

主科形家愛說田如筆世澤誰知硯是田

篁市人歸路向西沿溪斜上綠楊堤行行一片濃陰

裡慣聽黃鶯不住啼

周云清機一往深得宋人三昧若
在他入集中便是絕妙好詞矣

直北平原驛路通迤南陂蕩水空濛北高南下防乾

澇且喜村居在適中大岸之地地勢漸高賢莊黃王
為馬路額設軒鋪西通武進大

岸以南皆陂
蕩常有水患

百戰當年想壯圖嶺南素旆愴歸途環川此日重回

首慟甚黃公舊酒鑪亭弔逸

小西湖上董帷開秋水年年自溯洄話到六郎同一

笑○珠江得月不歸來○
謂西小湖董六

毛詩戴禮各專家里塾紛羅不厭譁○
謂東橫村毛更氏南湫戴氏

有太邱繁族姓都將文行竹林誇○
謂陳氏叔姪

東鄰申浦舊姻連著述今看後起賢○
吾家與申浦繆氏自國初至

今累世姻婭不絕今秋坪茂才幼丞上握手燕臺各

舍均勤學廟行小山太史著述尤多○
情話離鄉猶記廿年前○小山自庚申之亂由蜀入都

七雄建置溯源流百雉今餘土一邱○
尺荒村何處

師○夕陽衰草古城頭○
寰宇記利城戰國時築一名若溪一統志利城鎮西南三里

子城基城壕遺址尚存予按離大岸村半里許有村名城頭相傳為昔城垣故址然野徑荒蕪難尋舊迹矣

勾吳陳迹總荒涼廟貌重新攷訂詳○
記得童時矜捷

足○姬山○高處作重陽○
姬山相傳為吳太子墓亂後重建神廟家君作記極詳武祥

作姬山考載縣志

一邱荒翠賸苔斑良覆居然象小山○
始信搜神千寶

記○有時金盃出人間○
許或云以形如覆盃故名實古

墓也故老相傳墩內瓷盃甚多土人有吉凶大事須用多盃夜半奉香楮虔告質若干語旦輒如數給之

事過即償一夜仍歸墩內相沿日久明季有假而不歸者由是歇絕先曾祖容窗筆記載其事

梅花祠宇訪春初十字碑存歷劫餘藉古鄉關推第

一東周文字聖人書呼有吳延陵君子之墓傳為孔子所題亂後重建季子祠遍植梅花

有園亭之勝訪古者因可小憩焉

雲白山青好畫圖石門舊逕已模糊風塵誰有張華

識惆悵干將鑄劍鏞青山在葫橋鎮上有干將鑄劍鏞志稿內有石門又青山前有

白雲

千年陵樹已全荒誰拾殘磚古道旁寂寞倉墩秋草

遍不堪遺蹟問蕭梁倉墩在後梅鎮相傳為梁敬帝墓或呼蕭天子墓縣志云南史

於量就季卿買梁陵中樹皆坐免則此墓之傳有自

矣俗傳嘗有發之者得大花磚數十有巨蟲群出螫人乃不敢發

蘆琦廢院渺雲烟螺化猶聞異蹟傳一樹長松一池

水空山誰詎鳥窠禪秦望山麓蘆琦院為唐鳥窠禪師所居嘗止於大松之上因

以鳥窠名之又買螺螺半截者放池內後所

生螺螺皆半截舊有化螺亭今與院俱燬

陳云七雄以下六首詠懷古蹟詞意高渾數十首

西郊弦誦課功勤廣廈初開正樂群誰似吾宗賢令

尹一尊風雨共論文後梅鎮西郊書院為亂後始建甲戌春初時值風雨家噪青色

侯吳淵臨院開課尊酒淹留談竟夕

二百餘年世澤多誦芬述德廣搜羅斯文自有精靈

在歷劫居然幸不磨吾家入國朝以來先集甚夥庚中之亂悉燬余甲戌年里居

搜輯自五世祖以次制藝凡四十七篇付梓各附跋語如小傳名曰江陰全氏文贖全椒薛慰農觀察

序之以宜與儲氏為況全壇王氏桐城方氏為況

皮陸相從共唱酬舜山高躅已千秋蒼茫烟水空洄

湖誰泛當年五瀉舟吾邑在唐時魏不琢始以詩名隱居舜過山下與皮日休陸龜

蒙相唱和偕浮烟水間日休曾贈以釣船一載既酒加高橋俗稱白湯圩余已卯歲由都門旋里即

即今錫過高橋而行短射中流高吟五賦舜山蒼翠自無錫過高橋而行短射中流高吟五賦舜山蒼翠

正撲人眉宇也

不須贈帶感君恩濁酒黃鷄共至尊直與嚴陵比高

節白雲何處訪虞門焦丙虞門人明太祖之故人也洪武初徵求甚急間至金陵持

雞酒從甬道入與太祖班坐飲如徵時贈以金玉角三帶取角者授千戶無何挂帶於高橋門而去不知

之所

陳云二首望古遙集神韻悠然較前六首又是一

格

來春古港接江城，鷓鴣堆邊夕照明。
夏港在縣西十里，傳為夏禹所鑿，故名。舊為來春鄉。縣志：古蹟門有鷓鴣堆在夏港鎮。
愛買芙蓉新製好，葛衣涼襖竹初輕。
縣志載竹汗衫，截淡竹梢，線穿成衫。陳爽利汗輕細者佳。出夏鎮，即他處所稱芙蓉衫。

試尋利港橫埭口，疏濬頻年水利諳。
憶得倉皇爭北渡，石塢回首望江南。
利港即越絕書所稱利浦。宋知軍崔立濬以溉田。同治十一年亦濬之。橫埭河即立埭河，在其西。庚中避亂北渡者，吾鄉人多出此二港。

驚心怕見劫餘灰，十鎮團丁事可哀。
倉卒西陲倡忠義，如茶猶憶白巾來。
庚申賊至常郡，江陰之西十鎮皆裹白巾起義，屢與賊拒，勢卒不支，被禍甚慘。

陳云感慨亦不可少

州守風流憶往時，忽焉舊澤鮮留遺。
瑣言蟬史猶傳遍，不見文魚芍藥詩。
唐笏巖刺史名紳，所居西貫與大岸前後相望。先曾祖筆記中，有屠氏善報一條，即紀其先代積累之由。今則式徵甚矣。所著有六合內外瑣言二十卷。蟬史二十卷。近年上海以洋板刷印，流傳頗廣。洪北江詩話云：屠州守紳詩如蓄沿文魚裁盆芍藥，庚申亂後迄未見其詩集也。

藝海珠塵粵雅堂經師著述未淪亡只今丁豎流風

渺寂寞江村蘆荻荒丁豎鎮鳳德隆明經名詔有讀

塵中又鳳氏經說三卷刻於嶺南伍氏粵雅堂叢書

中李申者太史序云先生所居濱江村巷僻陋聚生

徒謀藉以活矻矻白首困而不戚

年七十餘卒嘉慶十有六年也

休文高隱寄江鄉兩絕詩書老更蒼韻事傳聞佳句

在白瑯還擬拜門牆石莊沈梓堂居士又舟工詩善

餘猶寄先祖詩有白頭還擬

拜門牆之句余童時猶及見之

有時侵曉入蘭城十里烟波似鏡平待得匆匆催返

棹到門燈火已三更郡城較邑城為近一日往返極為從容

迢迢九里十三灣記向蓉城數往還曲折沿流風不

定潮平但覺岸如山水道赴邑城必由九里河迤邐

以潮水順逆為遲速岸

崖高陡如行山峽中

投轄殷勤數舉杯至邑城常主陳

滿城簫鼓燈初試子懷太守家年年臘去又春回

看燈魚子懷太守家烹治最

佳以其淨洗而五味和也

雲曾出岫鳥知還寫照傳神阿堵問同是卧遊心跡

異○只○應○飛○夢○到○家○山○

陳云三十餘首一筆揮灑情景兼深
汪云髻鬢小長蘆檢討鴛鴦湖擢歌

轉餉赴鄂在輪舟度歲

去住渾無定，匆匆度歲辰。卅年萬里路，四海一家春。

快助風濤順，連日東重開。日月新歸棹，憐陸賈嶺外

話奇珍。時陸存陔通守由東返浙

汪云次鞅十字矜鍊

辛巳元宵前兩日抵舍

舞綵難逢捧檄便，征帆又卸草堂前。歸從嶺外書偏富，笑指梅梢月正圓。燈火連宵酬令序，笙歌比舍樂



豐年 椿庭尤喜孫行繞酌兒同開介壽筵

周云酷似隨園

壬午仲春東莞即事

郵程差喜海天寬碧嶂紅棉盡日看
北○宋○殘○碑○南○漢○
塔○有○誰○訪○古○到○東○宮○
東莞縣三國時為東官場城內鎮象塔為南漢時所造出地四尺有奇圍四尺為八面上刻大士像下週遭刻序文及咒語載身東金石畧余訪之其字已剝泐過半矣又資福祠有東坡羅漢閣記今存殘碑五十餘字嵌齋堂壁間
濛花萬紙賜當陽莞草編成五色光別有閒情徵物


產氤氲先藝女兒香
邑舊產濛花紙即蜜香紙俗呼香皮紙晉武帝以萬紙賜當陽侯杜預即此莞草出近海諸鄉以織蓆染五色如蜀縣以此得名女兒香產縣屬金桔嶺者佳

盧亭舊置媚川都荒蹟猶傳象未驅萬寶至今成沃壤不須更艷水懷珠

媚川池在城南大支海劉銀採珠於此設兵三千人號媚川都採珠用蜃蠶係海賊盧循子孫名盧亭大寶五年有犀象踏食田禾造塔鎮之是南漢時濱海地未盡闢也

由來天險固金湯轉餉頻年重海防第一虎門形勝

地不堪到此話滄桑
余辦沙田井科事宜並捐海防經費虎門為東莞縣境沙田尤



國家圖書館, NATIONAL CENTRAL LIBRARY, TAIWAN, R.O.C.

37

6

芙蓉江上草堂詩稿卷四

赴桂林雜詩八首

壬午七月

江陰

金武祥



泚生



客遊復宦遊浪跡二十年轉以風塵俗而得山水緣
捧檄忽西笑將擬驂鸞仙幸得良友偕况逢長官賢
勗以從政餘景物堪流連遐搜訪碑碣攬勝留詩篇
虞衡續范志載筆敢憚煩美惡紀風俗險要圖山川
聊備他日歸上獻芻蕘言

振

秦文伯觀察云少陵心事
汪云清轉流利

中國四瀆外西江為最巨牂牁通黔滇源流紛可數
每當春秋潦陡漲尋丈許征權多官簿洲渚闕堂宇
所嗟田廬湮流離常失所脩築力每絀籌賑惠難普
或言拆石壩下流無壅堵或言開支河勢散無使聚
因時而制宜準今以酌古年來幸豐穰雨暘亦無苦
行人喜安穩征途息桴鼓思患在豫防斯言或小補

秦云仁人之言

入境首蒼梧浩瀚三江合黔鬱桂三江灘江灘高高
三百有六十度數如周天星羅石重叠當關虎豹蹲
潛窟蛟螭蟄峽逼陽光微崖深陰氣吸千盤往復回
重險出又入涉淺九牛負升高萬蟻接龍門登崔巍
雷霹訝礮礚龍門雷霹皆灘名沂流八百里為期乃逾卅翻
喜上水遲山靈效維繫日日遊興豪漫慮官符急笑
指一鷺閒盡日灘頭立

秦云筆能達難之情畫圖所不能到

群山似招客峰峰作迎送每逢兩厓間青天只留縫
盤旋此中來似請君入甕溯從開闢時雕鐫巧誰弄
百態呈烟巒千靈闕巖洞松杉雜叢篠一片綠雲凍
在昔鎮九州祇聞五嶽重支幹達炎荒踰嶺竒始縱
遂令甲天下不肯作陪從我今幸來遊征途惜倥傯
幻想愧不廉諧語疑鑿空會當宿壺中攜歸作清供

秦云筆具化工

同舟有鄒陽仙侶稱郭李共濟道義孚聯情況桑梓

惟君紹家風忠臣有孝子五馬炎荒來及壯快從仕
比歲獨賢勞往返二萬里先公建牙地謳頌猶未已
撫今而感昔曷以繼前軌值此時事艱何以挽頹靡
所期各努力一柱中流砥

行役日以遠又值中秋節灑江動離思忽見團圓月
清光萬里同惜無縮地術遙想家晏開婆婆老人悅
諸孫進酒卮馥郁庭桂發亦復念游子豈慮甘旨闕
某山與某水行踪猶未悉感此低頭思乘風歸去決

誰與證此心江空月皎潔

遐陬五嶺西山多城邑少巖棹覓墟市零落復枯槁
地瘠而民貧厥性復悍慄邊壤連雜雄州郡雜獠
鎮撫或失宜屢煩王師討近代弄潢池星火忽原燎
嗟哉寬與猛實惟為政寶勿沽慈惠名養癰貽患早
勿以刑威休安靜民不擾富庶加以教由此舊習矯
安內遂攘外永永南服保

秦云此官邊陲者座右銘也勿以韻語視之

南服比交趾秦漢隸版圖九真與日南置郡同蒼梧
有明始棄之俾自為國都占臘三佛齊吞併俱膏腴
近日螭蚌爭得利誰為漁一統復舊壤會須宏遠謨
出師合滇粵分道而疾驅仍以設郡縣形勢控海隅
進戰退以守籌餉亦有餘南洋環萬島威德可遍敷
泰西或東來重鎮未敢踰倘讓捷足登強鄰尤足虞
及今而策之願以聞當途

秦云真經濟大本領是賴當途之為韓范者

梧州

九疑雲黯望模糊。何處遺踪訪有虞。烟水茫茫山寂寂。秋風一夕過蒼梧。

周云神韻獨絕
秦云天籟

笏竹塘晚泊

艤舟灘水急。竟夕風雨喧。推篷見明月。滾滾銀濤翻。林間有孤鶴。警露夜不眠。憂然振高響。飛破蒼山烟。

周云王孟勝境

昭平道中

連山何綿延。千重蒼翠積。山外更一峰。伸頭似窺客。烟雲忽縈繞。向背迷咫尺。何處樵歌聲。唱徹秋空碧。

周云畫家所不能到
汪云似洪稚存

曉過松林峽

重灘峻激聲喧囂。兩崖中間何寂寥。滌洄曲折不見底。一碧澄澈千里遙。灘師篙工百不用。欸乃始聽柔艣搖。松陰連綿間叢篠。中有瀑布萬點飄。幽花含露

媚澗谷紅紫錯雜冬春清晨曦穿林象鳥語涼颯
水游魚跳白雲一片嬾未散隔宿尚卧前峯腰安得
舍船不歸去餐霞嘔霧來誅茅巖頭有石似人立隔
著烟蘿手亂招

周云松林峽水漲時為灘江最險之處秋冬水落
乃有此妙境

陽朔山

鴻蒙肇造廓天宇蕩蕩中原闢堂廡龍沙馬塞游獵
場三吳兩越圖書府卻從嶺右築園囿化工位置自

上古導源不藉神禹鑿鍊石或煩女媧補雲霞燦爛
列屏幃洞壑參差紛牖戶形態各肖萬象包一一雕
鐫運神斧居然山水奇境開長使乾坤清氣聚繁華
轉笑仙居俗金銀宮闕瓊瑤圃西行我比驂飛鸞窺
園竟荷天公許何必局促名利羈且自逍遙風月取
李杜韓蘇昔未到偏讓後來快先覩何當一峰題一
詩墨花散作千峰雨時天旱望雨

汪云首段奇而確
秦云後半興趣淋漓令人有天際真人想

大墟登陸

莽莽秋風急，官程不計遙。
瘴雲為跼跼，落日馬蕭蕭。
汲水多村婦，耕畬雜峒獠。
七星巖在望，前路指花橋。

秦云音逼盛唐

抵桂林即事

灕江桂嶺獨宜人，且喜驂鸞愜賞心。
未必風塵皆俗吏，果然城市有山林。
瑤簪玉笋披圖畫，犵鳥蠻花閱古今。
愛看清光門外水，不妨小住傍榕陰。
寓傍榕樹樓下為榕

湖即古桂州南門舊有古榕唐時所植故名

隱山六洞

西郭有隱山，山隱名益顯。
人從六洞游，路向一峰轉。
每逢陰崖窄，欲入行僂蹇。
忽然啓堂宇，穹窿復曠衍。
天工奪人巧，築此仙人館。
虛明玉戶開，曲折丹梯踐。
泉磴相迴環，雲幔自舒卷。
乳結懸萬狀，眩視繪畫滿。
載讀磨崖碑，略辨唐宋款。
來趁朝陽明，去忘夕陽晚。
朝陽夕陽皆洞名
昔可泛舟入，採蓮棹歌緩。
嘉蓮洞以獻同心蓮得名今

杏

惜變為田滄波日以遠我愛巖洞奇游賞此其選必
以西湖重所見毋乃淺隱山李渤所開在西湖中劉克莊詩桂湖亦在西豈減頌

與杭今俱惟石可與語一笑首同點
灌為田矣
秦云筆墨化為烟雲烟雲擬為筆墨非詩以山傳

七星山棲霞洞

良為山覆盆厥象本中空石隕七星列雲穿一洞通
奇觀開世界元氣蘊鴻蒙聞說九疑路何人到底窮

志載洞通九疑山

此是神仙宅曾逢日月華至今山寂寞終古洞豁和
絕澗香流水半空飛冷霞碧虛遺跡在悵望一長嗟

唐鄭冠卿游洞中遇日華君月華君贈詩有不用過去行方便那得今朝會碧虛之句范至能因於洞傍建碧虛亭

秦云山本奇觀詩有奇氣次首尤飄飄欲仙

龍隱巖

宛然鱗鬣帶苔斑想見潛淵卧此山寄語神龍莫終
隱好敷霖雨到人間時久旱祈雨

月痕泉溜儘探奇。先游月牙巖。並訪滴玉泉。多少磨崖絕妙詞。鑿之象環壁為滿。皇祐平蠻三將題名。嘉祐宋頌。陸遊詩境等刻。皆在龍隱洞。獨有蒼茫懷古意。穿巖先訪黨人碑。黨人碑刻於粵西。者有二。一在融縣。真仙巖。一即臨桂龍隱巖也。

汪云次章風致殊勝

象山水月洞 在灕江西舊名灕山

灕江何澄澄。灕山何屹屹。香象渡河來。空明惟水月。

登獨秀峰下憇讀書巖 在桂林城北峭立五十餘丈。顏延之詩曰。未若

獨秀者。峩峩邪邑間。以此得名。讀書巖在峯趾。如環堵之室。

昂然雲表逐風翔。一柱真堪冠六鰲。絕地通天空倚傍。不嫌獨立太孤高。

秦云何等襟抱

象山俯視碧巉巖。一路磨崖覓舊剡。半嶺已驚高處險。不如還訪讀書巖。

秦云見道語

桂林周紱卿太史 璜 見贈律詩。即和原韻。

佳章投贈筆花妍。風雅能追十子賢。桂林舊有勝地十子集
如逢瑤島客。清才原屬玉堂仙。詩書鄙魯瞻師範。時主講院
山泉石藪皇屏俗。綠舜洞堯山。許同訪。可能不負小春天。

贈秦文伯太守煥

文伯文章伯。文名天下知。炎荒得循吏。當代重經師。
撫劍驚虹貫。承惠劍虹攜琴有鶴隨。一樽燕市酒。猶記識君時。已卯在都。朱雪岑部郎。黃子中。主政。招飲。皆與君同座。

疊綵山風洞次壁間袁簡齋韻

山石層層橫斷如疊錦綵元常

侍晦有記

桂林山水奇尤奇。在巖洞。疊綵錯綺繡。巖積每留縫。
紫綵紛萬狀。不暇日迎送。閒雲聚復散。乳溜滴還凍。
常侍清常處。賞題壁和者衆。曲折達後巖。入甕又出甕。
連峰翔鸞凰。怪石列鼇螭。快哉當此風。遽然醒塵夢。
果然勝登仙。山林麋鹿縱。好同彌勒龕。欲學維摩供。
松篁和天籟。日月瑤琴弄。笑謝當時人。利名何足重。

汪云維甕供等字皆不易押窄韻能使之寬險韻能使之平得坡公法矣

絃卿太史同游疊綵山用前贈詩韻成律詩余

仍次和兼以留別

疊綵真如錦綺妍良游幸遇主人賢
遍探山水原清福難得風塵似散仙
東嶺七星瞻突兀西湖六洞更延緣

先游樓小春又見歸橈放好折梅花寄遠天

舜山一名虞山城東北外里許有韶音洞南薰亭諸勝

言訪韶音洞獨上南薰亭隔江看不厭堯山一片青

山下還珠洞有石如柱去地一線不合

伏波山最奇俗名伏波試劍石南望隔江穿山

有洞如穴俗傳伏波飛矢所穿其實伏波並未至桂

飛矢貫危崖試劍斷危石將軍昔未到附會聲名赫

想見銅柱高茲山並無極

還珠洞

古竇幽巖碧玉灣朝朝遊遍桂林山欲從此洞稱觀

止自向珠江放棹還

汪云巧合

祝倪豹丞中丞文蔚六十壽時捧檄桂林蒙招

飲餽贐並示所著經說詩賦各種兼以誌謝

本是蓬萊第一仙新持旌節鎮南天蒼生久望為霖

雨名世原應享大年卹伯歡歌花黍膏秋間久早公步禱三日

甘霖立沛廣平春賦早梅妍霓裳仙曲金鏡唱時監臨文閣主試武

閣邊防亦屢次報捷都入稱觥介壽篇

籌邊號令肅關門盡掃烟氛答 至尊新息遠聞平

浪泊武襄早喜破崑崙滄溟秋淨重洋懾越南與法人閱和議

將紫塞春耕萬竈屯沿邊議興屯田更看經營宏八表巍然

柱石鎮乾坤

即論餘事亦千秋太史游蹤遍九州蘇海韓潮成述

作桑經麗註訂源流畫傳遠自雲林接墨妙多於瑣

院留閣中所書楹帖尤多自愧雕蟲珍敝帚一編都荷樂籠收

幘蒙五嶺遍甘棠捧檄還登八桂堂階下趨風晨聽

鼓亭前喜雨夜傳觴荊州愛士高千古諸葛開誠集

象長何幸雲霄垂盼睽從今一瓣祝心香

昭州謁道鄉書院

記從鄉國仰名儒，又見天南教澤敷。
道統淵源紹濂洛，炎荒遺蹟媿韓蘇。
建言兩疏忠彌著，並祀三賢德不孤。
舊有三賢祠，並祀范公祖禹也。感應清泉何處訪，
堂前憑弔意踟蹰。

檢客灘夜泊

碧嶂丹林又一程，晚霞低映水空明。
解開舵尾舟如葉，划到磯頭看月生。

贈番禺羅雪谷

名清，曾游日本，工指頭畫，曾以見贈。

南嶠生奇士，東瀛說壯游。
側身小天地，白眼傲王侯。
博望河邊石，成連海上舟。
何當從爾去，長嘯寄滄洲。
畫法王摩詰，詩情白樂天。
羅胸富邱壑，彈指變雲烟。
絕技空千古，飛行第一仙。
不嫌相促迫，真跡遍流傳。

題姚彥侍方伯涵秋閣圖

癸未

春明回首雪鴻留，觴詠當年紀勝游。
喬木十圍書萬卷，文章事業已千秋。

軟紅塵裏記幽探繞野山青爽氣涵怪底諸賢爭借
宅果然風景似江南惺時山中丞湯伯温刑部繆筱
珊編修均借寓此間武祥己卯

入都亦
屢至焉

巢痕一別上夔巫江漢旬宣到海隅遙指清風蒲若

雲恰宜秋興寄菴鱸時將歸浙

憇遍棠陰送別辰荔灣圖畫又重新綠波碧草天涯

感惆悵珠江一片春近繪荔灣送別圖

奉檄赴西甯今廣東西甯廣西岑溪以連
溪界互揭大府檄余詣勘

五嶺東西又此游風塵歷落幾春秋滄桑計畝都成

賦粵東各屬沙田案經數十年未辦余奉檄將新鹽
舊數千起查造冊籍咨部以安民業而裕課餉

鐵繡書漫借籌叱馭居然凌鳥道分疆從此劃鴻溝

歸帆倘過湖山勝準擬偷閒半日留擬順道游
鼎湖山

周云通體高渾直逼盛唐

羚羊峽

神禹昔疏鑿江淮河漢是嶺外通滇黔別為西江水
百有四十派一瀉數千里屹然羚羊峽入海必由此

到此受束縛狂瀾乃順軌惟當夏潦發湍激且倍蕪
曲折兩崖峻扁舟出其裏倘籍牽挽勞進尺退已咫
繫我乘機船衝波疾如駛快哉登龍門龍門又名曾不
一瞬耳遙指潮音閣縹緲碧雲起何當造蒲團一叩

西來旨山中有峽

周云中段堅鷲無不達之意

兩崖東西洞中有水石腴琢之以為硯珍重如璠璣
地脈孕山骨乃其柔肌膚花青蕉葉白品異名各殊

此峽當南方本值文明區產此助翰墨濡染交相需
惟聞大西洞舊石今則無流傳僅新製脆薄質已麤
雕鏤矜巧工期得善價沽況今世所貴翡翠珊瑚珠
生材闊氣運好尚規時趨問石石不語峽口雲模糊
此水流日下嘆息如斯夫

周云地脈句奇語却有至理又云後幅調中寄
慨不淺非效劉四罵人

錦石山一統志錦石山在羅旁水口上有石柱
高插雲表名華表石廣東新語云漢陸
賈使南越從桂嶺取道于此嘗禱山靈若佗
肯降當以錦為報後佗去帝號受南越王封

賈因以錦包山後錦不足植花卉代之因名錦石山至今異花甚衆舊有陸大中祠

華表江頭石誰尋陸賈詞歸來猶想像報錦尚傳疑
霸氣降炎徼高風憶往時磨厓應補泐漢使紀功碑

西甯道中

此是獠窟羅旁昔蔓延驚瀧咽銅鼓毒霧響藤弦
掃蕩一千里涵濡三百年居然風俗改耕鑿樂堯
天明時羅旁獠最威截江劫殺行旅為之不通萬
應四年調師二十萬剽平千餘里建羅定東安西
甯三州縣

次聯十字百鍊

百折千盤路崎嶇一線通極天惟鳥道闢地等蠶叢
蠻氣蒸成雨泉聲冷挾風梯田稱沃壤差喜歲常豐
周云筆氣廉悍

山行苦熱

萬山圍繞窄如甕清風欲招苦無縫下潦上霧毒氣
蒸况有赤日炙背痛崎嶇莫測世途危酷烈難逃苛
政重忽憶江鄉舊草堂小軒臨水送荷香綠陰如幄

蟬聲靜一覺閒眠到夕陽

周云狀難狀之景良由筆妙俗手難道隻字否
又云襤襪觸熱時讀此使人意消

通門曉發

五更扶夢起深入萬重雲露氣滿衣濕泉聲隔澗聞
俄看朝日上漸覺衆峰分最是探詩興巖花一路芬

周云工於發端承轉處尤精詩律非名手未易臻
此

連日山行口占

澗水東西有礧山田高下成梯佳處別饒畫意閒吟

儘有題詩

招客白雲讓路驚人怪石當關一片畫眉聲裏蠻荒

飽看青山地產畫眉鳥最多

枕榔一樹兩樹筍竹千竿萬竿雷雨前峯忽過飛來
瀑布生寒

橫水不安木杓中流穩渡籃輿好似江鄉泛艇白波
時濺衣裾

終日重巒疊嶂有時開朗豁然峒口交通阡陌墟場

稠密人烟

地從瀧水分隸俗是盤瓠舊居我朝始安耕鑿至今尤化詩書

周云即景命題隨意得句會心不遠天籟自鳴不事苦吟自然高妙此境殊不易到

游七星巖

萬里炎荒地何年墮七星在天符北斗終古鎮南溟湖堪青銅鏡山開白玉屏百神觴帝所吾欲叩蒼冥

星巖前臨湛湖玉屏巖最大為上帝觴百神之所

周云次聯截金為句何等凝重

况有清涼境言尋小洞天千秋留石室一片注寒泉古竇榕陰護幽巖石乳懸摩挲訪碑碣猶記宋元前

洞旁唐厓有李北海端州石室記

周云詩亦有清氣

游鼎湖山用壁間袁簡齋韻

昨游星巖渡瀝湖眾山巒應登高呼名山在望益心喜東指白雲三十里

唐時為白雲寺至明改慶雲寺移建今處

白雲一片

如相迎小歇山半登山亭山半有亭額曰小歇浮生始信偷閒

樂炎暑何辭觸熱行松杉夾道徑逾曲仙境還疑我

來復數日前曾夢游此山漱齒寒泉肺腑清照影空潭鬢鬢綠

入山萬事秋毫小此心未了都能了自向如來證夙

因蒲團一覺忘昏曉壁間原刻云萬丈狂瀾五道奔轟雷掣電忘昏曉今集中易擣韻蓋後來

洞天福地殊紛紛攬勝誰如此問好鼎湖自明

天崇間始開山移寺故道書洞天二十有四福地三十有六皆不與焉奇哉瀑布飛空

來水晶宮闕瓊瑤臺驚濤滾雪百丈瀉諸天淨洗無

纖埃瀑聲愈喧山愈靜坐忘相對同心齋杜鵑啼遍

巖前樹山中杜鵑鳥最多欲去徘徊不能去文字長留山水

綠風塵難得烟霞趣清福真叨大造恩卧遊幾度繞

吟魂今宵穩倚西江棹飛夢還應訪寺門

周云奇哉一段提頓得法全體俱振作長古須有此清雄之筆

題潘伯時大令清籟閣詩鈔

彭蠡匡廬秀黃山白嶽秋籍隸歙縣寄居鄱陽乾坤發清籟嶺

海盪羈愁翡翠炎方聚珊瑚渤澥求何如萬樹梅佳

詠遍羅浮在惠州和坡公詩最多

自汕頭至潮州雜詠

壯游三度指蓬萊海口有蓬洲城萊蕪山閩粵巖疆互市開形

勢從來今古異巍然崎嶇有高臺汕頭崎嶇地方省志海防未載近始建

洋式炮臺

排空波浪海茫茫回首前塵一斷腸何處天風響環

珮尋聲難覓蔡中郎兩次往來汕頭皆蔡絳卿大令留憩榭舍今舊地重來不勝黃

鑑之感蔡有天風環珮室詩稿

江山姊妹艷同年紫洞橫樓競管弦浪說潮嘉風月

好虛名最六蓬船

西湖可比杭州好西湖在城西北隅曾向湖邊幾度來更訪

江南名勝地金山遙對鳳凰臺金山在城北鳳凰臺在城東南隅

碑碣尚留鸚鵡賦兒童俱誦鱷魚文隔江遙指昌

黎廟萬古韓山對夕曛城東韓山有昌黎廟壁間石刻文公所書鸚鵡賦

京華一去萬餘里趙子當年可與娛此後高風渺難

繼婆娑誰弄海南珠昌黎別趙子詩揭陽去京華其里萬有餘不謂小郭中有子可

與娛。漢安海。水南。簸弄明月。珠按趙子。即趙德。潮州人。

昔日韓公排佛老。至今湘子說神仙。韓江浩渺湘橋

古。不廢千秋一樣傳。城東韓江湘子廟。橋上有湘子廟。

嗟官韻事調梅煮海誰如管子才。笑我不辭千里遠

碧琳琅館借書來。方柳橋太守時署運同。藏書最富有碧琳琅館。

脩閑官閣想鸞棲。咫尺天涯十里堤。訪戴恍疑乘雪

夜滿船。明月過梅溪。吳碩卿司馬有脩閑堂。時伴庵。埠函邀由梅溪而入。不及十里。

余於十四日夕。閒放棹。未獲往訪。

游金山在潮州城北

海陽有金山。東南稱最勝。明時額曰。行役有閒時。登

高且乘興。迤邐來城闔。曲折上巖磴。絕頂訪初陽。紅

霞海東映。初陽頂三字。為唐常袞書。堂廡改舊觀。花木列嘉蔭。雲

歛山如屏。波澄水如鏡。遥指湘子橋。宛爾雙虹飲。峰

前留古庵。時時一聲磬。吾鄉浮玉山。金碧炫明靚。涉

江訪高風。輕半帆。趁茲山命名。同相如。真慕蘭效顰

與爭妍。道遠莫可證。即事多所欣。懷歸聊寄詠。欲學

蘇子瞻愧無玉帶鎮

張丹叔觀察惠詩招飲西園次韻報謝

崇牙高擁敞樓臺，椰葉蕉陰覆綠苔。仙筆秋延吟館

靜，見示延秋吟館詩稿佛桑香護畫欄回。青憐蠻果登盤早，黃

喜江魚入饌來。有黃魚吾鄉惟四月間有之同憶鄉關好時節

雙螯勸酒菊花開

西園題壁再疊前韻

名勝西園比鳳臺，公餘猶許步莓苔。看山秋向牆頭

露倚檻風從水面回。烏聽書聲穿樹去，魚隨人影過

橋來。只嫌少阻看花興，紅藕香殘菊未開。

游湖山在潮州西北郭下有西湖

平生愛山如愛友，訪舊常嫌別離久。我與湖山莫有

緣，兩度來游猶記否。茲山秀絕炎海隅，發脈羅浮當

左肘。昨游嶺西復嶺東，去歲赴桂林今歲赴梧州探竒不厭東西

走，屈指塵勞閱五年。相對山靈慚老醜，登高先上四

望臺。嶺半有巨石舊題四望臺呼吸風雲摘星斗，尋幽下入小函

谷壁立危崖一線剖巖扉左闢識老君丈室虛明啟
戶牖剡苔重讀舊題詩風景依稀頻點首更指西湖
好畫圖誰向堤邊種花柳一笑何妨訂後期掉得吳
船還載酒

鳳凰臺題壁

正值重陽節來登百尺樓近依山郭靜遙挹海門秋
世態看雲幻名心逐水流何當騎彩鳳遐覽遍瀛洲
十二月十九祝東坡生日並餞鄒和之太守之

廉州危帥臣司馬之羅定州劉子謀司馬之
博羅縣

酌酒壽坡老微公誰與歸大江自東去孤鶴正南飛
勝友忽言別知音世所稀相期各努力莫遣素心違
笑我如羅友年三慣送人散材宜笠屐春夢悔風塵
磨蝎同憎命歌驪漫愴神梅花正相對共醉嶺南春

周云樸實中見風韻然是難得

新江道中 甲申三月

木棉紅遍暮春初。點染林巒畫不如。絕壁雲霞侵薜荔。荒原風雨戰桡檣。溪童慣逐牛爭渡。峒獠時隨犬趁墟。五載瘴鄉勞薄宦。何當歸去狎樵漁。

周云寫景詩於東坡放翁外別開一運可云無窮出清新矣然非踰嶺南游那得如許奇構耶

河頭晚泊翌日登陸

曲折深山裏。趨程水陸繁。古榕依隱堠。芳竹密成垣。巒翠四圍合。灘聲竟夕喧。西江疏鑿利。試證昔人言。昔人以西江水患。議於河頭。至黃坭灣。開鑿陸路四十里。使由陽江入海。以殺水勢。近年委員勘治。需銀

二千萬兩有奇。晴稿曾載隨筆。

周云寫景逼真。尤極自然之致。

慈雲巖

巖旁別出一峯。離五六尺許。額曰轉處。

突然平地起。路轉又峯回。玉笋忽旁出。碧蓮剛半開。厓空穿老樹。洞古蝕蒼苔。更寄滄浪興。來登近水臺。

周云次聯十字奇雋。神似太白。

劉仙巖

即通真巖。陽春縣志。唐時劉三妹善歌。與白鶴書生唱和。遂俱化去。

一去恍遺響。空山合有神。仙緣聯白鶴。高唱本陽春。

天上吹簫侶。江濱解珮人。古今誰屬和。悵望隔紅塵。

舟發黃泥灣

愛將風景紀炎荒。又向黃灣一葦航。巖暖猿搜花。釀酒林深狸攫果。為糧飛泉白洗雲。烟淨過雨青含草。木香此是粵江西畔水。不堪回望海天長。水道提綱以陽江為

粵江以西諸水之一。即漢陽江也。

周云此種奇景。惟嶺外有之。不意盡被漣生搜入錦囊。何不廉之甚耶。

過陽春

一江新漲碧于油。雲白山青處處幽。恰值雨餘風日好。暮春時節過春州。

周云妙句天成。

漢陽江

僻小炎旸路。居然足勝游。奇峯似陽朔。異境得春州。洞壑山陰道。神仙海上洲。難尋十三疊。夢寐瀑泉流。

陽春白水山。有十三疊瀑泉。屈翁山謂為天下飛泉之冠。

陽春縣夾江奇石。自雲霖鋪至下馬水百餘里。

于役過此詩以紀之

壯歲悔風塵征途慨日月寸心聊自怡每遇山水窟
竭來漢陽江竒峯快羅列譬如論文章其秀能在骨
必具皴瘦透乃見真面出中空乳凝玉外峭色積鐵
倒插如瑤笏橫排儼象笏蹲獅與翔鳳一一意態活
松竹相迴環雲泉互曲折居民與猿鳥高下爭洞穴
蓬窗喜吟眺扣舷每叫絕巖外佳山水指數亦首屈
竒與陽朔爭勝或羅浮匹所惜過客稀駉鸞記載闕

僻在炎海隅獨不厭埋沒佳人守幽貞高士樂隱逸
感此生遐心臨流浩歌發

古良舟中

自黃灣順流至此轉行逆水至八
甲若至陽江仍順流七十里即至

行遍上水下水看盡前山後山漢陽三百餘里不嫌
曲折彎環

趁墟十里五里結寮三家兩家相望烟雲竹樹閒談
鷄犬桑麻

過了清明時節高低插遍新秧再熟舊聞海國三時

猶記江鄉種後秧甫插齊三時雨水最闕豐歉

霽色纔明，稚徑夕陽乍繫漁舟，兩岸蟲聲如雨，暮春

好似新秋。

周云僕之官南甯時方二月舟至梧潯以上每夜泊輒聞蛩吟每欲寫以絕句未果不知滋生已先下手矣可恨

八甲登陸

南來風俗詭高涼，菽粟魚鹽足海疆，遍野牛肥農事重，連村犬靜里民康，離披隔隴栽烟草，曲折沿籬護火

秧，要與遐瓊圖久治，撫綏端合賴循良。上年會匪滋事幸而撲滅

周云烟草火秧天然的對

那黃嶺茶亭題壁

白日慘淡陰風號，惡木叢棘啼怪鴉，危崖坐踞猛虎，嗥奔走魑魅愁猿，猱剪徑狙伺行李，剝喋血往往魂難招，昔有善士憂心忉，吳君闢除榛莽烈火燒疊石架木路一條，翼然有亭，雙峯坳往來憇息行者勞，進以茗飲清盈，歌泉聲盈耳，雲霞飄喜蔭列植好鳥巢。

樂哉到此忘炎燬我獨感喟首重搔世途險巖不可
逃消磨劇削權誰操平平蕩蕩吾能謠出門大笑青
天高

電白溫泉寺

在天值離明在地近炎海一冷八十年此熱終不改

粵中見聞云萬歷初泉忽涼
冷越八十餘年澹之復溫

蓬勃池水蒸旁有冷泉灌白石鬚浴池泉自後流出
甚熱旁有冷泉實可資挹

注譬彼熱場中一服清涼散

片石尋浴沂寺外有石丈許
題字曰浴沂名春風詠前哲襟抱具太

和此心自冰雪

西上訪冰井前至梧州
訪冰井寺南來見溫泉炎涼曾歷遍來

往歎年年

莊山寺在電白城北

出郭訪山寺坡坨三里餘泉聲奏琴筑嵐翠襲襟裾
一粟寄滄海門外即
見大海浮雲感太虛深慚遠行役塵俗
未能除

登望海樓

巍然形勢古稱雄，目極扶桑大海東。
島嶼風腥魚變虎，高屬多虎半樓臺雲幻蜃連虹。是日虹見倏為雲掩土人云此蜃氣也
重洋氣混迴瀾紫，萬道光搖旭日紅。
到此九州疑地盡，鄉關回望思無窮。

周云是何意態雄且傑如此鍊句方稱得題佳

電白即事

草木炎荒異魚鹽，海國饒孤城三月暮。
萬里一身遙

雲黯枕椰雨，風腥玳瑁潮。
偏隅諷土俗，還欲紀歌謠。

周云滋生檀吏才郡邑有事大府每檄君詣甚以故嶺東西足跡殆徧即事寫景之作隨地成編奇麗清新日不給賞僕遊邕莞亦多此體往往皆憂思懷苦之音每一披吟足覘君福澤之厚矣

中棚雨霽

青嶂參差放出黑，雲斷續收還林。
花似錦步幘，溪水如碧玉環。

小泊腰古墟

春去愛初夏，川原景物妍。
綠榕濃護社，紫芋蔓成田。

鵝鴨弄新漲鷄豚喧晚烟溪邊有漁父看盡往來船

曉過石門

客程先向五更催曉色朦朧隱未開殘月漸低風露
冷橈聲搖過石門來

周云幽雋

題梁星堂篆窩覓句圖

嶺外遍訪秦漢碣吟覽頻溯牂牁行掛帆猶記西南
路三十六江秋月明

梁三水西
南墟人

長至日王庚白齋尹招同劉東生別駕小酌東
生有詩和韻一首

相逢一尊酒懷抱且同開鄉思白門柳東生金陵人吟情
庾嶺梅風塵憐客久歲序又春來太息邊氛惡誰為
濟世才

王子展通守王栗甫大令俱有詩酬韻一首

茫茫感身世青眼為誰開詩酒宜吾輩乾坤老此才
空懷陶令菊東生詩云漁竿浩蕩以余時有歸志也且賦廣平梅得附

三王後

庚白亦和詩

何嫌數杯

舉

東坡云嶺南氣候不常菊花開時乃重陽涼天

佳月即中秋容齋續筆載東坡在海南以十

一月十五日汎酒作重陽云庚白近得佳菊

遂以是日招飲東生子展粟甫各紀以詩

菊花開時乃重陽東坡韻事傳炎荒十有一月十五

日餐英幾輩同飛觴此邦藝菊若束縛天機逸趣遂

牯亡何來數株獨瀟灑不求依附矜孤芳歲晚幸有

老松伴春早喜共官梅香寒燠錯雜節序奈賓主歡

讌形跡忘酒波花影忽炫轉飛上當頭明月光

是日為月

當頭年之此月不常有况有良朋同聚首清景何曾異

古今閒吟原不爭妍醜

子展席間論詩語

起舞婆娑醉不知

數遍長空幾星斗此時還欲問東坡涼天猶似中秋

否不談桑海有變遷堪笑風塵因奔走人生行樂須

及時萬事不如杯在手

用明朱野航句對語為一年幾見月當頭即詠此日也

嘉平朔日汪君美生招飲即席賦贈

雅集同來問字車鴻泥何幸聚天涯連宵凍雨難成
雪一樹寒梅已著花連日陰雨頗冷窗外且喜著書
多歲月所著隨山館詩及松未容却聘老烟霞制軍
屢聘酒酣閒話滄桑事怕聽聲都轉海工笳
未就

觀迎春十二月十八日

一年春事兩番新本年正月八日立春玉律重回嶺海春傳遍
春城春色艷廣州以童男女扮演故春官不看春
人

青旂綵仗擁和鸞白叟黃童夾道歡真個宦游驚物
候十年不在故鄉看

十二月十九日王子展通守招同人小集祝東

東坡生是日立春

良會睽古歡天涯驚物候剛逢南海春好祝東坡壽
八百餘年來此日亦罕覯條風布始和萬花已如繡
牡丹桃李均已開放娑娑簪綵幡芬芳列嘉豆食饜花豬肥席
燒肉極佳畫仿松鶴瘦東坡有生日謝劉景文古畫松引

滿谷起舞一曲南飛奏惟公生有自精靈實奎宿無
端困磨蝎黨籍貶元祐忠孝必感格金蓮賜帝后官
歷遍嶺外文明啓荒陋上追韓昌黎陟降相左右長
留筮履圖瞻拜幾回又值此歲序新猶記賓朋舊去
是日劉子諶司馬有是集子執訊想梅開同心憶蘭
展亦在座令子諶作令博羅賦
臭今昔有王郎稱觴快先後東坡有生日王郎以賦
詩各有述援筆可立就炎荒縱無雪險韻尖又鬪近
多作疊韻詩 千秋辨香奉一酌清酒有文章與事業新傳

誰受授祝公願學公不朽垂宇宙

乙酉孟夏至梧州謁虞帝廟

迢遞牂牁幾溯洄炎荒今值凱歌回茫茫懷古無窮
感獨謁蒼梧舜廟來

梧州大水顏義宣大令見示七古作此和之

神禹疏鑿所不到五嶺以外惟粵江水道提綱總名此江為粵江
上通黔滇入海不數四瀆源流長惜無洞庭彭蠡大
澤使溇瀘但見南北左右合注同披猖左江即南江右江即北江

此州兩粵值衝要，羣水爭滙勢不降。今年春夏苦積潦，洪波浩漭疑懷襄。村墟高下牛漂蕩，田疇遠近誰隄防。我初定居不暇避，鼃鼃入室蛙跳梁。危樓四壁撼風雨，舉首竊睨驚望洋。有時乘船屋角過，略辨城郭陵阜幾點留微茫。吁嗟邊陲免兵燹，忽降淫雨罹凶荒。天時不足人事補，邑有顏子稱循良。威懾梟悍警游惰，恩煦鴻集招流亡。作者奮筆作長句，盛氣欲挽狂瀾狂。相期中流作砥柱，好與南交銅柱永。垂

無疆。

仲秋偕徐季同固卿彥皋昆仲游冰井寺歸途

憇準提禪林

為訪唐賢蹟，相攜佳客游。泉聲從古冷，山色向人秋。林缺晨曦逗，江空宿潦收。登亭思漫更，碑碣試重搜。

寺有漫泉亭

歸途得幽憇，高閣似馮虛。準提閣之前覓磴古苔滑。

打窗黃葉疏，山城開畫境。季同擬以塵世亦仙居。此景作畫

仙祠會仙橋為韓襄毅遇呂仙處潭水明如境何人此坐漁

重九集準提禪林疊前韻

佳節又重九，炎荒悵宦游。幸逢三管靜，高唱百蠻秋。
風雨尊前合，烟霞筆底收。壁間題句在，酬和韻頻搜。
身世茫茫感，浮雲悟太虛。千秋憑俯仰，兩鬢漸蕭疏。
莼菜縈歸思，黃花憶舊居。何當掉頭去，蹤跡混樵漁。

王誦之別駕四疊原韻仍用前韻贈之

嶺西山水窟，好與謝公搜。同攬蒼梧勝，俄驚黃菊秋。

生香斑管艷，君善繪事得句錦囊收。何幸聯高唱，冰泉兩度游。

三萬六千頃，茫茫笠澤漁。蒹葭一泖溯，雲樹自蕭疏。
可許天涯客，相從湖上居。扁舟他日訪，歸隱願非虛。

送顏義宣大令受代還桂林仍用前韻

信有絃歌化，賢哉仰子游。斯才非百里，餘事亦千秋。
珠玉連篇富，珊瑚一網收。壬午分校得士稱盛望眉多傑句，引

我快勤搜

所列望眉草堂集
余採入近刻中



國家圖書館, NATIONAL CENTRAL LIBRARY, TAIWAN, R.O.C.

金石心同契，文章名不虛。
循良民事亟，風雅俗情疏。
棠蔭傳輿誦，梅開感索居。
息交聊閉戶，經籍好佃漁。

